

Xujun xi kits'ínkjihí nda postru Pablo xuta ninku Roma

B'i ts'ín kikjaniñaha Pablo xuta ninku xi tjin nanki Roma

¹ An Pablo, an nda musu síhin Jesucristo. Ntíaná kits'ín mana nku nda postruhú tu xi k'uenijmíhina éh nda tsuhu,

² éh nda tsu xi kitsú nga tsjá nk'ie nga kits'ínkinchjá já profetaha xi nkú ts'ín tjt'a xujun éhen Ntíaná, kui xi tsje.

³ Éh nda tsuu tínchjanijmíyaha Ntíhi, kui xi Nda Ntíaná Jesucristo. Nk'ie nga yjoninte kik'a, ntjehe nda rej David nibaha ra.

⁴ Kó nk'ie nga j'áiyaha ngabayoo, Espiritu Santo y'éjña chji nga kui xi Ntíhi Ntíaná xi tjihin nga'yún.

⁵ Kitsjana kjuanda kó kits'ín mana nku nda postru ngajoho tu xi tu má k'uenijmíhi ra xuta nga tjihin nga s'ejihin kó kuint'é'éhen.

⁶ Jun tintsubajiun xuta xi kis'enijmíhi, kui nga xutaha Jesucristo kamahanu.

⁷ Ngayjoo xuta ninku xi tintsuboo nanki Roma tít's'ínkjínuu kui xujuin. Tjoho Ntíaná jun kó j'ájinnuu nga kikjats'enuu.

Kas'enuu kjuanda kó kjuajyu xi tsjáná Ntia Na'miná kó Nda Ntíaná Jesucristo.

B'i ts'ín kitsúya Pablo nga mjehe ngjuaisehe xuta ninku Roma

⁸ Kui ni xu'bjí xi tjun xinnuu. Tu ngat'aha nga Nda Ntíaná Jesucristo ts'ená, tsjaha máb'achjíhi Ntíaná

ngat'aha nga ja kichjubó éhen ko nga ngúsuhun asuntee tichubanijmíyaha xi nkú ts'ín s'ejinnuu Ntíaná.

⁹ Ngayjee animana títs'inxát'aha Ntíaná nga tít'enijmía én nda tsuhu Ntíhi, ko kui xi be nga tehente ts'inkjónuu nk'ie nga nchjaka.

¹⁰ Bankihí Ntíaná tsa kui xi mjehe katsjáníyána nga kama kfínsenuu.

¹¹ At'aha mje nkjúnna skuenuu tu xi kúásinkohonuu nga sakúnuu ni xi tsjáná Espiritu Santo, tu xi ndjá kuinchahanu.

¹² Mjena nga xi nkú ts'ín nkuhú s'ejinná k'uai nga'yúnkoho raá xinkía.

¹³ Jun já nts'e, mjena nga choo nga nkjin niyá kama mjena nga kfínsenuu tunga santahá ni nd'ai tjín ni xi tít'échjana. Mjena ta ts'ian xá xi kitsjana Jesucristo ajinnuu xi nkú nga ta títs'ian ajihín xuta naxinantá xingisoo.

¹⁴ Tjihín nga ts'ian ajihín tu mí xutahá ni xá xi kitsjana, xuta xi nchja én griego ko xi nchja kj'ai én, xi nkjink'uhun ko xi najmi nkjink'uhun.

¹⁵ Kui nga mangimjehena nga k'uenijmíhinuu ko ta jun xi tintsuboo Romá én nda tsuhu Jesucristo.

B'i ts'ín kitsúya Pablo nga tjihin nga'yún én nda tsuhu Jesucristo

¹⁶ Najmi ma subana nga én nda tsuhu Jesucristo b'enijmía, at'aha kui xi nga'yúhun Ntíaná xi ts'ínk'ankikoho ngayjee xi s'ejhin, xi ntje judio tjeheñ ra ko xi najmi ntje judio tjeheñ ra.

¹⁷ Én nda tsuhu Ntíaná bakúchji xi nkú ts'ín Ntíaná tsjáha xuta nga naxu ma nginkun tu

ngat'aha nga s'ejihin. B'a ma at'aha s'ejihin, xi nkú ts'ín tjit'a éhen Ntíaná nga b'í títu: “Xi ja naxu nginkun Ntíaná tu ngat'aha nga s'ejihin k'úéjña tík'un.”

B'í ts'ín tsakúya Pablo nk'ie nga ngayjee xuta tjihin jé

¹⁸ Ntíaná xi tijná nk'a ján b'éjña chji kjuakjahan nga ts'ín nibánehe ngayjee xuta xi najmi benjúhún ko incha ts'ín ni xi najmi naxu nginkun. Kui xuto xi b'échja nga cha ni xi naxu tjin.

¹⁹ At'aha ni xi yaha Ntíaná, kui ta incha be. Ntíaná ta y'éjña chjihí.

²⁰ Najmi tjin xi nkú ts'ín b'a incha kuitsuhu nga najmi be. At'aha xi nkúhu nga kamanda asuntee tísakúchji nga'yúhún Ntíaná xi najmi maha ndyja ko nga nkuhú kui xi Ntíaná. Kjuaxi kjáihin nga najmi ma chji Ntíaná, tunga kamankjihinná tsa chaseéhe ni xi kin'enda.

²¹ Tunga ta ndahá ni tsa incha kieke jóo ni xi ts'e Ntíaná, najmi incha kits'ínkie yjoho nga Ntíaná xi tjihin kjuachánka ko ta ndaha najmi incha kitsjáha máb'achjihí. Tu sa ní ni xi najmi chumi ni chjihí ra incha kits'ínkjink'un ko incha kama jyihin.

²² Já nkjink'un chubá incha kits'ín mahá yjoho, tunga já síhí incha kama.

²³ Incha kits'ín t'axín kjuachánkaha Ntíaná, kui xi najmi maha 'me. Kits'ínsjoho sénnistjihin xuta xi maha 'me ko sénnistjihin nisee, chu ko ye.

²⁴ Kui nga Ntíaná kits'ín ndáihí ra xuto nga ni xi najmi ndoo incha ts'íihin, ni xi nchjaha animaha. Ta kui ta maha najmi incha kikienkjún yjonintehe nga ch'on kits'ínko.

²⁵ Incha kits'ín t'axín éhen Ntíaná xi naxu tjín. Tu én tsank'óghó incha tsakj'á. Incha kikienkjún kó incha kits'íntsjoḥo ni xi kin'enda antehē ni nga xi kits'ínnda niu ts'ííntsjoḥo, xi tjíhin nga n'etsjoḥo tu nkjéhé ni. B'a tjín.

²⁶ Kui nga Ntíaná kits'ín ndaíhi ra xuto nga ni xi suba maná incha ts'ín. Jmínchjín joo incha y'éntu xi nkú ts'ín tjeḥen ra nga incha ts'ínko x'íhin.

²⁷ Já x'in ya ta incha y'éntu xi nkú ts'ín tjeḥen ra nga incha ts'ínko jmínchjún. Ta kuihi xinkjín x'in incha kits'ín mje. Tjín kjuasuba ni xi incha kits'ín. Ta kuihi jáx'in incha kikjantuko xinkjín. Tunga ta incha kits'ínkjáíhín ra chjí xi tjeḥen ra kjuangasten xi incha kits'ín.

²⁸ At'aha najmi incha kits'ínsihin Ntíaná, kui nga Ntíaná kits'ín ndaíhi ra nga kuatsúhun kjuankjink'uhun, tu xi incha ts'íhin ni xi najmi ma n'e.

²⁹ Kui nga kitsejín ra ngayje tíkja ni ch'onk'un. Najmi naxu incha ts'ín, fantuko jmínchjín xi najmi kjee bixan, incha fásihin ni xi tjín xinkjín kó ch'on incha ts'ín. Kitsejín animaha kjuaxintak'un, incha ts'ínk'ien xinkjín, kó ta kitsejín kjuachán, kjuamaña kó kjuach'onk'un.

³⁰ Nchjane xinkjín, én tsank'á ts'ínne xinkjín, ts'ín unkie Ntíaná, najmi ch'a benkjún, ma ngak'un, nk'a b'asje yjohó, kjuankjintak'uhun b'asjejin nkjin tíkja ni xi ch'onk'un, najmi nt'é'éhen xi cháha,

³¹ si, najmi ts'íntjusun én xi nchja, najmi ch'a xi ts'íntjo, najmi ma n'e jnenta kó najmi ma nimaha xinkjín.

³² Be xuta xu'bo nga xi b'a ts'ín ngabaya tje_hen ra, at'aha b'a ts'ín y'éña Ntíaná. Tunga tu nku b'ahá tíncha ts'ín kō santaha tsjo incha maha nga kj'aí xi b'a ta ts'ín.

2

B'i ts'ín tsakúya Pablo nk'ie nga Ntíaná ts'ínkòkjua ngayjee xuta

¹ Ji xi chaseih_i yá xi nda kō yá xi najmi nda kō t'n'ek'anji jé xuta xi kj'aí, najmi t'ín nkú ts'ín n'esjenkihini yjoh_i. Nk'ie nga chaseih_i yá xi nda kō yá xi najmi nda, ta ji ta maha n'ek'anji jé yjoh_i, at'aha ji b'a ta n'ei.

² Yaá nga kixi ts'ínkòkjua Ntíaná xuta xi b'a ts'ín.

³ Ji nda, ji xi chaseih_i yá xi najmi nda tít's'ín kō nk'ie nga b'a ta n'ei, ¿a b'a bixín nga kuitjunkihi yjoh_i nga ts'ínkòkjuahi Ntíaná?

⁴ ¿Á t'n'e t'axih_in r_i yjoh_i kjuanda chánkaha Ntíaná kō nk'ie nga tu xí ts'ín'yún tak'uhúnna kō nk'ie nga tu xí ndahá ts'ín? ¿A najmi mankjih_in ri nk'ie nga kui kjuandaha Ntíaná tít'sjániyáhi nga k'úinchj'aha r_i animahi?

⁵ Tunga tu ngat'aha nga ndjá t'íyahi kō nk'ie nga najmi t'ímichj'aihi animahi, tu sahá t'n'etsené yjoh_i kju'un xi nibanehe asuntee nistjin nk'ie nga ts'ín nibá Ntíaná kjuakjahan kō ts'ín sisin kjuá.

⁶ Nk'ie b'a kamoó, Ntíaná tsjáha chj_ihi nga nkúnkú xuta ngat'aha xi nkú t'ín ni xi kits'ín.

⁷ Xuta xi tu nku t'íncha tít's'ín ni xi nda, xi b'a ts'ín t'íbangisjáhi nga sakúhu kjuachánka xi tsjá

Nt̄ianá k̄o nga nda chá k̄o nga k'úéntu t̄ík'un s̄ín, kui xut̄aha xi Nt̄ianá ts'íínk'íéntu t̄ík'un s̄íh̄in.

⁸ Tunga xut̄a xi sin k̄jua k̄o najmi nt'é'éhen ni xi nax̄u t̄jín, xi t̄u sahá nt'é'éhen ni xi najmi ndoo, kui xi incha ts'íínkjáíh̄in k̄jua'un xi ts'íín nibánehe Nt̄ianá k̄o k̄juak̄jahan.

⁹ K̄juanim̄a k̄o k̄juaba sakúh̄u ngayjee xut̄a xi ts'ín ni xi ch'onk'un, b'aha rá xut̄a xi nt̄je judiō t̄jehen rá k̄o xi najmi nt̄je judiō t̄jehen rá.

¹⁰ Tunga ngayjee xut̄a xi incha ts'ín ni xi ndoo, kui xi sakúh̄u k̄juachánka xi tsjá Nt̄ianá, nda chá k̄o s'ehe k̄juajyu, b'aha rá xi nt̄je judiō t̄jehen rá k̄o xi najmi nt̄je judiō t̄jehen rá.

¹¹ At'aha namji ngabi ts'ín Nt̄ianá.

¹² Ngayjee xi incha kits'ín ngatitsun nga najmi be k̄juat̄éxuma xi kin'ekj'asehen Moise, t̄u nkú ndyjahá tá ndaha tsa najmi kits'ínk̄ok̄juaha k̄juat̄éxumoo. K̄o ngayjee xi incha kits'ín ngatitsun nga ja be k̄juat̄éxuma xi kin'ekj'asehen Moise, kui k̄juat̄éxumoo ts'íínk̄ok̄juaha.

¹³ Najmi xut̄a xi t̄u basínñjuhú rá k̄juat̄éxumoo xi nax̄u ma nginkun Nt̄ianá. Xut̄a xi ts'ínt̄jusun ní k̄juat̄éxumoo xi nax̄u n'e ma.

¹⁴ Xut̄a xi najmi nt̄je judiō t̄jehen rá najmi kik'aih̄i k̄juat̄éxuma xi kin'ekj'asehen Moise tunga ts'íh̄in ni xi t̄itsu k̄juat̄éxumoo, at'aha mankjih̄in ni xi nda k̄o ni xi najmi nda. B'a ts'ín kuenta ts'e suba sakúh̄u rá nku k̄juat̄éxuma, ndaha tsa najmi t̄jñaha k̄juat̄éxuma xi kin'ekj'asehen Moise.

¹⁵ Incha bakúchji xut̄o nga ajin animaha t̄jít'a ni xi bakúya k̄juat̄éxumoo. Animaha tsuyaha tsa nda k̄o tsa najmi nda ni xi t̄incha ts'ín. K̄o

kjuankjintak'uhun tsuyaha tsa tjeheñ jé ko tsa najmi tjeheñ ngat'aha ni xi tíncha ts'ín.

¹⁶ B'a kama nistjin nk'ie nga Ntjaná k'uéxaha Jesucristo nga kuasehe ni xi tjintu'maha xuta. B'a kama xi nkú titsu éñ nda tsu xi tób'enijmía.

B'i ts'ín tsakúya Pablo nk'ie nga ta tjihin jé xuta judio ndaha tsa kui kik'ahí kjuatéxumoó

¹⁷ Ji xi b'a tixín nga ji xi ntje judio tjeheñ ri, nga kjuatéxuma xi kin'ekj'aseheñ Moise kich'ai ko tsjo mahi at'aha Ntia nku tutuu s'ejihin.

¹⁸ Yai ni xi mjehe Ntjaná nga n'ei. Yai má nihi xi nda at'aha kjuatéxumoó kisakúyahi.

¹⁹ Behe tak'uín nga mahi baku niyáíhi xuta ka ko nga ji xi nkú joyaha nku nd'í xi ts'ín ndzjehen xuta xi tjíma má jyuun.

²⁰ Ji xi bakuyáíhi xuta xi najmi be ni xi ts'e Ntjaná. Ji xi nda maestruhu xuta xi najmi mankjihin, at'aha tijnahi kjuatéxuma xi bakúchji kjuankjintak'uun ko ni xi naxu tjin.

²¹ Ji xi bakuyái, ¿a najmi bakuyáha ri yjohi? Ji xi b'enijmí nga najmi ma n'e ndyjé, ¿a n'ei ndyjé?

²² Ji xi b'a bixín nga chankjáán kjuabixanná, ¿a b'a n'ei? Ji xi unchai ntia xi ntsja xuta ts'ínnda, ¿a najmi n'ei ndyjé ninkuhu ntia xu'bo?

²³ Ji xi tsjo mahi at'aha yai kjuatéxuma xi kin'ekj'aseheñ Moise, tunga najmi tíyankjúní Ntjaná nk'ie nga tíbiyunéi kjuatéxumoó.

²⁴ B'i titsu éheñ Ntjaná má nga tjt'a: "Ngat'anuu najmi tíyankjún Ntjaná ajihin xi najmi ntje judio tjeheñ ra."

²⁵ Chjíhi ra nga kin'ehi circuncision tsa tín'etjusuin kjuatéxumoó. Tunga tsa tíbiyunéi

kjuatéxumoo, circuncision xi kin'ehi b'a ma xi nkúhu tsa najmi kin'ehi niu.

²⁶ Kui nga tsa xi najmi kin'ehe ra circuncision kj'uatjoho ni xi tjít'a kjuatéxumoo, ¿a najmi n'echjíhí ra ni xi títs'ín nga chāsehe xi nkúhu tsa kin'ehe circuncision?

²⁷ Xi najmi kin'ehe circuncision yjonintehe tunga títs'íntjusuhún kjuatéxumoo, kui xi k'uejñanehi ni xi kanéhi ji xi tjíñahi kjuatéxumoo ko kin'ehi circuncision tunga tíbiyunéní.

²⁸ Najmi yjonintee tsuya yá xi judio, ko najmi ni xi n'ehe yjonintee xi circuncision xi ndoo.

²⁹ Judio ní xi b'a ts'ín tjíyahā ko circuncision xi nda, kui ní xi ma ajin animahā xuta. Espirituhu Ntíaná b'a ts'íun, najmi ni xi tjít'a xujun. Xi b'a ts'ín tjíyahā, Ntíaná nda nchjanehe xuta xu'bo, najmi xuta.

3

B'i ts'ín tsakúya Pablo nk'ie nga tu nkú naxuhú ts'ín Ntíaná

¹ Kui b'a maha, ¿mí ni xi tjín saha xi ntje judio tjeheh ra ni ma? ¿Ko má xi kui chjéheh circuncision?

² Chjíhí ra niu, tu xi nkú ts'ín chāsehé raá. Títjun Ntíaná kits'ínkjas'ehen xuta judio éhen.

³ Tjín xi najmi kis'ejihin éhen Ntíaná, tunga, ¿a kuihí nihi xi ts'ín nga Ntíaná najmi ts'íntjusuhun éhen?

⁴ ¡Najmi! ¡Ndaha tsa mí yehe! Ndaha tsa tsank'á ngayjee xuta, tunga Ntíaná tu nkú ts'íhín ni xi naxu tjín. Xi nkú ts'ín tjít'a xujun éhen Ntíaná nga b'i títsu:

S'ejña chji nga ji xi naxu nk'ie nga chubai,
ko n'e ngana nk'ie nga n'ekokjuahi.

⁵ Tsa kjuach'onk'unná b'ejña chji nga Ntíaná xi naxu ts'ín, ¿nkú kuixíaán ni ma? ¿A najmi naxu ts'ín Ntíaná nk'ie nga ts'ín nibájennená kjuakjahan at'aha ch'on k'aán? Nk'ie nga b'a tíxian, tínchja xi nkúhu nku nda.

⁶ ¡Ndaha tsa mí yjehe najmi b'a tjín! At'aha tsa najmi naxu ts'ín Ntíaná, ¿nkú ts'ín ts'ínkokjuaha xuta?

⁷ Tunga tsa ngat'aha én tsank'á xi tínchja, ko tsa b'a ts'ín tís'ejña chjihi nga b'a tjín ni xi ts'ín Ntíaná ko sakú saha kjuachánka, ¿á b'a tí'minaha ni ma nga ngatitsun títs'ian?

⁸ Ka ma ra b'i k'úihín xinkía kai: “Ch'on n'eé tu xi nda kamaha asunntej.” B'a tíncha tsu xi tíncha nchjayaneni nga kui niu xi tíncha bakuyái. Nda tjín nga s'ejñanehe mí nihi xi kanéhe xi b'a tíncha tsuu.

B'i ts'ín tsakúya Pablo nk'ie nga najmi tjín xi bichú ma naxu nginkun Ntíaná tu ngat'aha nga ts'íntjusun kuatéxumoo

⁹ ¿Nkú kuixíaán ni ma? ¿A 'yún nda sai jin xi ntje judio tjeheenni nga xuta xi najmi ntje judio tjehe n ra? ¡Najmi! ¡Ndaha tsa mí yjehe! At'aha ja kuayaá nga xi judio ko xi najmi judio nkuhú ngatitsuun tjíntujín.

¹⁰ Xi nkú ts'ín tjít'a éhen Ntíaná nga b'i títsu: Najmi tjín xi naxu nginkun Ntíaná, ndaha nku najmi tjín.

¹¹ Najmi tjín xi mankjihín, najmi tjín xi bangisjai nga skue yáha Ntíaná.

¹² Ngayjee kindyjajihín niyóo,

nkuhú nga tsatsuhun anjimaḥa.

Najmi tjín xi nda ts'ín, ndaha nku najmi tjín.

¹³ Ngabaya y'ahaḥa ra ni xi tsu,

tṽ subahá én tsank'á nchja.

Én xi bitju ts'a b'a joyaha xáhan ye,

¹⁴ kitsehe ts'a én ch'on tsu kṽ én stinta.

¹⁵ Kĩtsa b'ema nga ts'ínk'ien anjima,

¹⁶ ni xi incha ts'ín ts'ín x'ahan xuta kṽ kjuanima
tsjáha.

¹⁷ Najmi incha be má tjín kjuajyu,

¹⁸ najmi incha tjínjin tak'un

nga Ntíaná xi tjíhin nga chanjún.

¹⁹ Yaá nk'ie nga xuta xi tijnanehe kjuatéxuma
xi kin'ekjas'eheñ Moise, kjuatéxumoo tinchjakoḥo
xuta xu'bo tṽ xi nk'ie nga kuasehe ra Ntíaná mí
nihi xi kits'ín xuta najmi ta incha kuinchjaha nga
najmi ta kuitjunkiḥi ra yjohṽ.

²⁰ At'ahaḥa ndaha nku najmi naxu chaha nginkun
Ntíaná tṽ ngat'ahaḥa tsa ts'intjusun ni xi tjít'a
kjuatéxumoo. At'ahaḥa tṽ sa ní kjuatéxumoo b'éjña
chjiná nga tjínná ngatitsun.

*B'i ts'ín tsakúya Pablo nk'ie nga tṽ ngat'ahaḥa
nga s'ejihin xuta Jesucristo naxu bichú ma nginkun
Ntíaná*

²¹ Tunga nd'ai ja y'éjña chji Ntíaná xi nkú ts'ín
naxu ma xuta nginkun. Najmi kjuatéxumoo xi
maha b'a ts'ín. Santa níhi ma n'eya ni ajihin xujun
kjuatéxuma xi kin'ekjas'eheñ Moise kṽ ni xi y'ét'a já
profeta.

²² Ngat'ahaḥa ní nga s'ejihin xuta Jesucristo, b'a
ts'ín naxu maha nginkun Ntíaná. Kṽ b'a maha
ngayjee xi s'ejihin, at'ahaḥa najmi ngabi ts'ín Ntíaná.

23 Tu ngat'aha nga ngayjee xuta kits'in ngatitsun, ndaha nku najmi sakuhu kjuachanka xi Ntiana tsja.

24 Tunga chankaha kjuandaha Ntiana xi tu titsjaha nga naxu kama xuta nginkun, at'aha Jesucristo y'echjintjai xuta ko kits'in ndahi jehe.

25 Kui xi Ntiana kits'in ma nku chje. Tsatendzjo jnihi tu xi sakuhuna kjuan'endyjat'a nk'ie nga s'ejinna Jesucristo. B'a ts'in tsakuchiji Ntiana nga naxu ts'in. Nistjin nk'ie, tu ngat'aha nga tsenta najmi kits'innijehe ra xuta ngatitsun xi kits'in.

26 Tunga nistjin nd'ai ja tsakuchji nga naxu ts'in ko nga tu nku naxuhú tits'in nk'ie nga titsjaha xuta nga naxu ma nginkun tu ngat'aha nga s'ejihin Jesucristo.

27 Kui b'a maha, za tjin nku ts'in kama nk'a n'esjehena yjona nginkun Ntiana at'aha ngat'aha kjuatexuma xi kin'ekjas'ehen Moise naxu kama-hana nginkun? Najmi kama. S'ejna t'axin ni xu'bo tu ngat'aha nga s'ejinna Jesucristo.

28 At'aha mankjinna nga ma naxu xuta nginkun Ntiana tu ngat'aha nga s'ejihin Jesucristo, najmi ngat'aha tsa ts'intjusun ni xi tijt'a kjuatexumo.

29 Za tu nkuhu Ntiana xuta xi ntje judio tjehe ra Ntiana? Za najmi koho Ntiana xuta naxinantá xingiso? Jhon, b'a tjin. Ntiana ta Ntiana xuta xi najmi ntje judio tjehe ra.

30 At'aha nkuhu maha Ntiana xi ts'in nga naxu ma xuta judio xi kin'ehe ni circuncision at'aha s'ejihin, ko ta tsja nga naxu ma xuta xingiso xi najmi kin'ehe ni circuncision tu ngat'aha nga s'ejihin.

³¹ Kui nga, ¿a t́in'endyjanáa chj́ihj kjuatéxumoꝝ tu ngat'aha nga s'ejinná? ¡Najmi b'a t́jín! Tu sa ní b'a ts'ín tí'baihí raá chj́i xi t́jín kjuatéxumoꝝ.

4

B'i ts'ín y'éjña chubayaha Pablo nga kits'ínchjén ntje cháha xuta judio xi 'mi Abraham

¹ Chubanijmíyahaná ntje cháná Abraham. ¿Mí nihi xi kisakúhu?

² Tsa Ntíaná kits'ínkjáihín Abraham nga kui xi naxu tu ngat'aha ni nda xi kits'ín, ka ma ra nk'a k'uasje yjoho. Tungá najmi kamahá nk'a k'uasje yjoho nginkun Ntíaná.

³ ¿Nkú títsu éhen Ntíaná ngat'a ts'e ni xu'bo? B'i títsu: “Kis'ejihín Abraham Ntíaná ko kui niu xi kits'ínchjíhí ra Ntíaná nga Abraham xi nku nda xi naxu.”

⁴ Xi nkúhu xuta xi ts'ínxá, kui xi ch'axkihí ni xi ts'ín ko b'a ts'ín s'echj́ihí ra. Najmi tu 'baihí ni xi ts'ínkjáihín.

⁵ Tungá máha xuta xi najmi ma 'yún k'un ni nda xi kits'ín, nga tu sahá s'ejihín Ntíaná xi tsjáha xuta ngatitsuun nga naxu ma nginkun, Ntíaná be nga xuto s'ejihín ko kui niu xi b'axkihí Ntíaná nga naxu basehe.

⁶ B'i kitsú David nga: ¡Á b'a nda t́jín ts'e xuta xi Ntíaná naxu basehe, najmi tu ngat'aha ni xi kits'ín tsa kui kjuaha nga naxu n'e ma!

⁷ B'i ts'ín y'é't'a:

¡Á b'a nda t́jín ts'e xuta
xi kin'endyjat'aha ra jéhe,
ko kin'endyjajnuhu ngatitsuhun!

8 ꞑÁ b'a nda tǰihin ts'e nda
xi Ntǰaná najmi b'axkihǰi ra ngatitsuhun!

9 ꞑA tu nkuhú xuta xi kin'ehe ni circuncision sakúhu kjuanda xi títsu David, a ra kohó xi najmi kin'ehe ni circuncision? Ja b'a kuixíaán nga Abraham kis'ejihin Ntǰaná ko nga kui niu xi kin'echjǰhi ra nga naxu kin'e ma.

10 Tunga, ꞑnkjé kin'echjǰhi ra Abraham nga kui xi nku nda xi naxu? ꞑA nk'ie nga ja kin'ehe ni circuncision, a ra nk'ie nga najmi kjehe n'ehe ni circuncision? Nk'ie nga najmi kjee n'ehe ni circuncision b'a kama.

11 Askahan kin'ehe Abraham ni circuncision. Kui niu xi kama nku chuba xi kis'et'aha, chuba xi tsuhu ra nga naxu kama at'aha kis'ejihin Ntǰaná nk'ie nga najmi kjee n'ehe ni circuncision. B'a ts'in j'ai maha Abraham na'mihǰi ngayjee xuta xi s'ejihin Ntǰaná, ndaha tsa najmi kin'ehe ni circuncision. Ntǰaná b'axkihǰi xuta xu'bo xi nkúhu xuta xi naxu.

12 Ko ta j'ai ma Abraham na'mihǰi xuta xi kin'ehe ni circuncision, xi najmi tu nkú ni circuncision kin'ehé ra, ko ní ta s'ejihin Ntǰaná xi nkú ts'in kis'ejihin ntje cháná Abraham nk'ie nga najmi kjee n'ehe ni circuncision.

B'i ts'in tsakúya Pablo nk'ie nga kits'intjusun Ntǰaná ni xi kitsúya tǰtjuhun Abraham

13 Ntǰaná kitsúya tǰtjuhun Abraham nga kui ko ntje xi s'ehe askahan ts'ínkjǰhǰin asuntee nga kama ts'e. Tunga najmi ngat'aha ní tsa kits'intjusun Abraham kjuatexuma xi kin'ekjas'ehe Moise, tsa kui kjuaha nga b'a kik'in tǰtjuhun ra. B'a ní kik'ihin

at'aha kis'ejihin Ntíaná ko kui niu xi kich'axkihí ra nga kui xi naxu.

14 At'aha tsa xi tíncha ts'íntjusun kjuatéxumoó, tsa kui xi ts'íinkjáihin ni xi kitsúya títjun Ntíaná nga tsjá, kui xi tsuhu ra nga najmi chumi ni chjíhi ra nga s'ejihin xuta Ntíaná ko najmi ta chumi ni chjí kamaha ra én xi kitsúya títjun Ntíaná.

15 Nk'ie nga biyuné kjuatéxuma xi kin'ekjas'ehe Moise, kjuakjahan Ntíaná ts'ín nibánehe xuta. Tunga má najmi tjín kjuatéxumoó, najmi tjín xi nkú ts'ín kuiyúnehe ni xi títsu.

16 Kui b'a maha, at'aha ní nga s'ejihin xuta Ntíaná, kui kjuaha nga sakúhu ra ni xi kichuba títjun, tu xi ngat'aha kjuandaha Ntíaná sakúhu ra ngayjee ntjehe Abraham ni xi kichuba títjun. Najmi tu nku xi y'aha ra kjuatéxumoó xi sakúhu niu. Ta sakúhu xi s'ejihin Ntíaná xi nkú ts'ín kis'ejihin Abraham Ntíaná. Kui xi na'miná ngatenteé

17 nginkun Ntíaná xi nkú ts'ín tjít'a, má nga b'a kitsúhu Ntíaná Abraham: “Ji xi kits'in maha na'mihí nkjin xuta naxinantá.” Kis'ejihin Abraham Ntíaná, kui xi ts'ínk'íéntu tík'un xuta k'ien ko tu ts'ínkjohó ni xi najmi kjee tjín, as'ai s'e.

18 Abraham kikuyá ni xi kik'ihin ko kama na'mihí nkjin nkjún xuta naxinantá at'aha kis'ejihin Ntíaná, ndaha tsa najmi tjín xi nkú ts'ín kuitjusuhun niu. Kama xi nkú nga kik'ihin: “B'i ts'ín nkjin kama ntjehe.”

19 Tu nkú kis'ejihin ra Abraham, ndaha tsa kamankjihin nga ja tu xí nibajehén ra yjonintehe at'aha ja ma kfehé ra unchan nú ko tsa ngat'aha nga ntí Sara xi chjuúhun maha.

²⁰ Najmi jo jan kamaha tsa najmi ta kis'eji_hin ra ni xi kitsúya tíjuhun Nt_ianá nga tsjáha. Tu sahá ndjá tsasinjña sa nga kis'eji_hin ko kits'ínkie yjoho nga cháka Nt_ianá.

²¹ Y'énku k'un nga tj_ih_in nga'yún Nt_ianá ko nga kamaha ts'íntjusun ni xi kitsúya tíjuhun.

²² Kis'eji_hin Abraham Nt_ianá ko Nt_ianá kits'ínchj_ihi ra niu nga Abraham xi nku nda xi naxu.

²³ Má nga tjít'a nga Nt_ianá kits'ínchj_ihi ra nga kis'eji_hin Abraham, najmi tu nkuhú ngandaha Abraham kis'et'a niu.

²⁴ Nganda níná kis'et'aha niu. Ta n'echj_iná ko ñá xi nkúhu xuta xi naxu at'aha s'ejinná Nt_ianá xi kits'ínkj'áiyaha ngabayoo Nda Nt_ianá Jesu.

²⁵ Kui xi kin'ek'ienntjáíhi ngatitsunná ko kin'ekj'áiya ngáha ra ngabayoo tu xi ta kamahaná xuta xi naxu nginkun Nt_ianá.

5

B'i ts'in tsakúya Pablo nk'ie nga nd'ai tjínkoná kjuajyu Nt_ianá

¹ Kui b'a maha, naxu kamaá nginkun Nt_ianá at'aha s'ejihinná Nt_ianá ko tjínkoná kjuajyu ngat'aha ni xi kits'ín Nda Nt_ianá Jesucristo.

² At'aha s'ejinná Nt_ianá, kui nga Jesucristo kits'ihin nga tsitjas'enjihinná kjuanda xu'bi. Ndjá tinchajián kjuandoo. Kui nga tsjo mahaná nk'ie nga tichuyáá kjuachánka xi tsjáná Nt_ianá.

³ Ko najmi tu nku ni xu'bi xi tsjo maná. Ta tsjo maná kjua'un xi títitjajíáán, at'aha yaá nga kjua'uun tsjá nga'yúnná tu xi n'e chúkjuahaná ni xi tímat'aán.

⁴ Kō tsa n'e chúkjuá, kixi bitjukaá ni xi tímaná. Kō tsa kixi bitjukaá ni xi tímaná, ma chuyáá ni nda xi tsjáná Ntjáná.

⁵ Kō najmi sakúná kjuasuba, ndaha tsa najmi kjee tíyaá ni xi tíchuyáá. At'aha Espiritu Santo xi kik'ainá kits'íntsejihin animaná kjuatjoho Ntjáná.

⁶ Nk'ie najmi kama kin'ek'anki subaá yjoná, Cristo k'ienntjáíhi xuta ngatitsuun nistjin xi kitsú Ntjáná.

⁷ Ni tjin tsa tjin xi kuayántjai nku xuta xi naxu ts'ín, tunga kutsa tjihín xi kama k'un kuayántjai nku xuta xi 'yún nda.

⁸ Tunga Cristohó k'ienntjáíhiná nk'ie nga xuta ngatitsun saá. B'a ts'ín tsakúchjili Ntjáná xi nkú ts'ín tjoho ná.

⁹ Nk'ie nga ja xuta xi naxu kamaá nginkun Ntjáná ngat'aha jni xi tsaténdzjo Cristo, ¿nkú ts'ín najmi n'ek'ankihiná nistjin nga ts'ín nibájen kjuakjahan Ntjáná?

¹⁰ At'aha nk'ie nga kamaá xuta kontraha Ntjáná, ngat'aha ngabayaha Ntíhi kinchjako ndaná. ¿Nkú ts'ín najmi n'ek'ankiná ngat'aha kjuatík'uhun Ntíhi, ná xi ja nchjako ndaná nd'ai?

¹¹ Kō najmi tu suba ni xu'bi tíchuyáá. Ta tsjo maná nga Ntjáná kjuáts'ená, at'aha Nda Ntjáná Jesucristo kits'ín nga tíbichúk'un ngáha raá Ntjáná.

B'i ts'ín tsakúya Pablo nk'ie nga Adan j'aiko ngabayoo tunga Jesucristo kits'ínk'íentu tik'unná

¹² Ngat'aha ni xi kits'ín nku nda ngatitsuun jas'en asunntej ko ngatitsuun j'aiko ngabayoo. B'a ts'ín ngjindjuhu ngabayoo ajihin ngayjee xuta, at'aha ngayjee xuta kits'ín ngatitsun.

13 Kintehe ni nga Nt̄ianá kits'ínkjas'ehe_n Moise kjuat̄exumoo kis'e ngatitsun asunntej, tunga najmi ch'axkihí r̄a ngatitsun xi ts'ín xuta nk'ie nga najmi kjee t̄jín kjuat̄exumoo.

14 Yaha nk'ie nga n̄istjihin Adan santaha n̄istjihin Moise tsat̄exuma ngabayoo. Ta k'ien xi najmi kits'ín ngatitsun xi nkúhu xi kits'ín Adan. Adan, kui y'ejña chubayaná xi kj'uaí askahan.

15 Kjuandaha Nt̄ianá najmi b'a joyaha xi nkúhu ngatitsun xi kits'ín Adan. At'aha ngat'aha ngatitsuhun nku nda nkjin xuta k'ien, tunga ngat'aha kjuandaha nku nda, kui xi Jesucristo, nkjin xuta 'yún kisakúhu kjuandaha Nt̄ianá ko ni xi tu kitsjáhá r̄a.

16 Ko ni xi tu kitsjáhá Nt̄ianá najmi b'a joyaha xi nkúhu ni xi y'aha r̄a ngatitsuhun Adan. Ngat'aha nku ngatitsun xi kits'ín Adan, Nt̄ianá kits'innijéhe ko b'a ts'ín jé y'ejñajihin. Tunga askahán ni nga kis'e nkjún ngatitsun, tu kitsjáhá Nt̄ianá nga naxu kama xuta nginkun.

17 Ngat'aha ngatitsun xi kits'ín nku nda tsat̄exuma ngabayoo, tunga ngat'aha ní nku nda, kui xi Jesucristo, incha k'úentu t̄ík'un ko kuat̄exuma xuta xi ts'ínkjáihin kjuanda chánkaha Nt̄ianá ko k'uaihi nga naxu kama nginkun.

18 Kui b'a maha, xi nkú ts'ín tu ngat'aha nku ngatitsun xi kits'ín nku nda jé y'entujihin ngayjee xuta, b'a ta ts'ín tu ngat'aha nku ni nda xi kits'ín nku nda naxu bichú ma ngayjee xuta nginkun Nt̄ianá ko k'úentu t̄ík'un.

19 Xi nkú kama nga najmi kint'é'én nku nda ko kui nga nkjin xuta tsichu maha xuta ngatitsun, b'a

tā kama nga kint'é'én nku nda ko kui nga nkjin xuta naxu kuichú maha nginkun Ntíaná.

²⁰ Ko tā j'ai s'ejña kjuatéxuma xi kin'ekjas'eheñ Moise tū xi sáha ngatitsuun, tunga nk'ie nga ja kisé ngatitsuun, 'yún kisé sa kjuandaha Ntíaná.

²¹ At'aha xi nkú ts'in kis'ehe nga'yún ngatitsuun ko j'aiko kjuabayoo, b'a tā ts'in tjihin nga'yún kjuandaha Ntíaná, kui xi ts'in nga naxu mahaná nginkun ko ts'ínk'íéntu tik'un sínná ngat'aha ni xi kits'in Nda Ntíaná Jesucristo.

6

B'i ts'in tsakúya Pablo nk'ie nga ja tsayahaá ngatitsuun ko nga tintsuba tik'unkaá Cristo

¹ Kui b'a maha, ¿nkú kujíhinná? ¿A tū nku n'enáhá ngatitsun tū xi 'yún s'ejña chji saha kjuandaha Ntíaná?

² ¡Najmi! ¡Ndaha tsa mí yjehe! Ja tsayahaá ngatitsuun. ¿Nkú ts'in kuintsubajin sahaná ngatitsuun?

³ ¿A najmi yanú ni xu'bi? Ngatenteé xi kiséntájián Jesucristo nkuhú ja makaá ko nkuhú ja tsichu majihín ngabayaha.

⁴ Nk'ie nga kiséntájián Cristo, b'a ts'in tsyakohoná ko kis'eyanjikaá, tū xi kuintsuba tik'un tsetse ngáhaná xi nkú ts'in Ntía Na'miná kits'ínkj'áiyaha Cristo ngabayoo nk'ie nga tsakúchji kjuachánkaha.

⁵ At'aha tsa nkuhú tsichu makaá Cristo nk'ie nga k'ien, b'a ts'in tā nkuhú kuichú makaá nga kjuaiya ngáhaná xi nkú ts'in j'áiya ngáha rá ngabayoo.

⁶ Yaá nk'ie nga kisut'a kruukaá Cristo. Najmi b'a tā ts'in tintsubahaná xi nkúhu nk'ie. Ja tsatsun

yjonintená xi tǐjñajihin ngatitsuun tu xi najmi ta kuinú'yá'éhen raá ngatitsuun.

⁷ At'aha xi 'me, najmi ta tǐjn xi nkú ts'íihin ra ngatitsuun.

⁸ Tsa ja tsayakaá Cristo, ta s'ejinná nga ta kuintsuba tǐk'unkaá.

⁹ Yaá nga Cristo j'áiya ngáha ra ngabayoo ko najmi ta kuayá saha. Najmi ta tǐihin ra nga'yún ngabayoo tsa nkú ts'ín saha.

¹⁰ At'aha nk'ie nga k'ien Cristo, nkuhú niyá k'iehen tu xi kikjexihin ra nga'yún xi tǐihin ngatitsuun. Ngat'a ts'e nga tǐjña tǐk'un, tǐjña tǐk'un xi nkú ts'ín mjehe Ntǐaná.

¹¹ Ko máha jun, b'a ta ts'ín n'enkjǐntak'un nga ja tsayoho ngatitsuun ko tintsuba tǐk'un xi nkú ts'ín mjehe Ntǐaná, nga nkuhú makoo Jesucristo.

¹² Kui b'a maha, najmi tu 'baintehe ruu ngatitsuun tsa kui xi kuatéxumaha yjonintenuu xi maha 'me, tsa kuinú'yá'óhoon nga n'oo ni xi mjehe yjonintenuu.

¹³ Najmi tu ngatitsuun 'boho yjonintenuu, tsa ni xi najmi nda n'oo. Tu sa ní Ntǐaná tjohon yjonuu, jun xi ja tsayo ko j'áiya ngáhanuu ngabayoo. Tjohon yjonintenuu Ntǐaná nk'ie nga n'oo ni xi naxu n'e.

¹⁴ Najmi ta kuatéxumahanuu ngatitsuun, at'aha najmi ta kjuatéxumoo tǐjñanehenuu. Kjuandaha ní Ntǐaná tintsubanui nd'ai.

B'i ts'ín tsakúya Pablo nk'ie nga najmi ta batéxumahaná ngatitsuun

¹⁵ Ei ni ma, ¿a n'eé ngatitsuun, tsa najmi ta kjuatéxuma xi kin'ekjas'ehen Moise tǐjñanehená,

at'aha kjuandaha Ntíaná tintsubankiá? ¡Najmi!
¡Ndaha tsa mí yjehe!

16 ¿A najmi yanú, tsa tjín xi n'ekjas'ohoon yjonuu nga kuinú'yá'óhōon xi nkúhu xuta musuhu, jun xi bichúmo xuta musuhu xi tínu'yá'óhōon? Tsa xuta musuhu ngatitsuun kamo, kuayó. Tunga tsa kuinú'yá'óhōon Ntíaná, naxu kamo nginkun.

17 Jun xi kamo xuta musuhu ngatitsuun nistjin nk'ie, tunga nd'ai máb'achjíhi ra Ntíaná nga tu sahá ngayjehe animanuu tínu'yá'óhōon én xi tsinchiyó, én xi kin'ekjas'ennuu.

18 Ja kamandoóho ngatitsuun ko tsichumo xuta musuhu ni xi naxu tjín.

19 Tíb'ejná chubayanuu ni xu'bi nga tínchjakonuu at'aha 'ni mankjinná nii. Nistjin nk'ie, ni xi chuntí nginkun Ntíaná ko kjuach'onk'uun kin'ekjas'ohoon yjonintenuu tu xi ch'on kin'ehenu. Xuta musuhu niu kamo, tunga nd'ai n'ekjas'on yjonintenuu nga kamo xuta musuhu ni xi naxu tjín tu xi xuta xi ts'e Ntíaná kamahanu.

20 Nk'ie nga kamo xuta musuhu ngatitsuun, kjin tintsuboho ni xi naxu tjín.

21 ¿Mí nihi xi kisakúnuu nga kin'o ni xi kin'o nk'ie, ni xi tu subahá manuu nd'ai? Ngabaya y'aha ra ni xi kin'o.

22 Tunga nd'ai ja kamandoóho ngatitsuun ko yjankihuu Ntíaná. Tísakúnuu kjuaje xi tsjánuu Ntíaná tu xi kuintsuba tík'un síhinnu.

23 At'aha ngabayoo, kui xi chjíhi ngatitsuun, tunga Ntíaná tu tsjáhá nga k'úéentu tík'un sín xuta xi nkuhú mako Nda Ntíaná Jesucristo.

7

B'i ts'ín y'éjña chubaya Pablo nga ja tsayahaá kjuatéxumoo

¹ Jun já nts'e, tínchjakonuu jun xi yo kjuatéxuma xi kin'ekjas'eheñ Moise. ¿A najmi yanú nk'ie nga tjíntu tík'un sa xuta y'aha kjuatéxumoo?

² Xi nkúhu nku tachjuún xi tíjñaha x'in, tjít'a kjuatéxumoo nga najmi tíhin nga k'uéjña x'ihin. Tunga tsa kuayá x'ihin, kama ndaí ngáha ra yjoho kjuatéxumaha kjuabixoon.

³ Kui nga tsa kj'ai nda k'uéjñakoho nk'ie nga tíjña sa x'ihin, títangane kjuabixahan. Tunga tsa kuayá x'ihin, kama ndaí ngáha ra yjoho ni xi tjít'a kjuatéxumoo. Najmi títangane kjuabixoon tsa kj'ai nda k'uéjñako ngáha.

⁴ B'a ta kamanuu, já nts'ena. Xi ja k'ien najmi ta y'aha ra kjuatéxumoo, ko jun ja tsayakoo Cristo nk'ie nga k'ien tu xi kj'ai xi kama ts'e ngáhanuu. Xi j'áiya ngáha ra ngabayoo, kui xi ts'enuu nd'ai. B'a ts'ín kama n'eheñá ni xi ts'e Ntíaná.

⁵ Nk'ie nga kich'a saá asuntee, ngatitsuun kits'ínxájin yjonintená. Ngatitsuun kits'ínchjén kjuatéxumoo nga kin'e mjeé ni xi najmi nda, ko kin'eé ni xi tjeheñ ra ngabaya.

⁶ Tunga nd'ai ja najmi ta kjuatéxumoo tíjñaneheñá, at'aha ja tsayahaá kjuatéxuma xi kik'ít'a'yunná nistjin nk'ie. Kui nga t'ín'eheñá ni xi mjehe Ntíaná nd'ai xi nkú ts'ín títakú niyá tsetsená Espirituhu Ntíaná, najmi xi nkú ts'ín tsakú niyáná xujun xi kis'et'a nistjin nk'ie.

B'i ts'ín tsakúya Pablo xá xi tíhin kjuatéxumaha Ntíaná

⁷ Ei ni ma, ¿nkú kuixíaán? ¿A kjuatéxuma xi kin'ekjas'eheñ Moise y'a ngatitsun? ¡Najmi! ¡Ndaha tsa mí yjehe! Tunga tsa najmi kis'ejña kjuatéxumoo, najmi kkie ra ni xi 'mihí ngatitsun. Najmi be tsa najmi nda tjín nk'ie nga ni xi tjihin xuta kjuasíhín tsa najmi b'í títsu kjuatéxumoo: “Najmi tu fasihín ni xi tjihín xuta.”

⁸ Tunga ngatitsuuhún kits'ínchjén ni xi tjít'a kjuatéxumoo ko b'a ts'ín kinchjahana nga jasihín nkjin tíkjá ni xi najmi an ts'an. At'ahá tsa najmi tjín kjuatéxuma, najmi tjihín nga'yún ngatitsuun.

⁹ Xi nkúhu an. Nk'ie nga najmi kje s'ejñanena kjuatéxuma xi kin'ekjas'eheñ Moise, tsátejña tik'an. Tunga nk'ie nga kamankjinna ni xi tjít'a kjuatéxumoo, kisakú nga'yúhún ngatitsuun, as'ai tsaya.

¹⁰ Kkie nga kjuatéxuma xi tjihín nga ts'íink'íejña tik'unna, kui xi tu sahá kits'ínkjina ngabayoo.

¹¹ At'ahá ngatitsuun kits'ínchjén ni xi tjít'a kjuatéxumoo tu xi ts'anachahana. B'a ts'ín kits'ínk'ienkohona ni xi tjít'a kjuatéxumoo.

¹² Jehé kjuatéxumoo, ko ni xi tjít'a kjuatéxumoo je ko naxu tínchja ko nda.

¹³ Tunga, ¿a ni xi ndoo xi kitsjana ngabaya? ¡Najmi! ¡Ndaha tsa mí yjehe! Ngatitsuun ní kits'ínchjén ni xi ndoo nga kitsjana ngabaya tu xi chaha nga kui xi ngatitsun. Ni xi tjít'a kjuatéxumoo tsakúchji nga tu xí 'yúhún ch'onk'un ngatitsuun.

B'í ts'ín tsakúya Pablo ni xi ts'ihín ngatitsuun

¹⁴ Yaá nga kjuatéxumoo ajihín Espirituhú Ntjaná tsitjuhu, tunga an asuntee y'ahana. Ja ts'atsena ngatitsuun ko an kama nda musuhu.

15 Najmi mankjinna ni xi ts'ian. At'aha najmi ni xi mjena ts'ian. Tu sa ní ni xi najmi sasínna, kui nihi xi ts'ian.

16 Tunga tsa ts'ian ni xi najmi mjena ts'ian, ni xi títs'ian títs'inkíékòhona yjona nga nda kjuatéxumoo.

17 Kui nga najmi ta an xi b'a ts'ihinna nga b'a ts'ian. Ngatitsun xi tijnajin nína xi b'a ts'in.

18 Be nga xi nkú ts'in y'ahana asuntee, ndaha nku ni xi nda najmi tijnajinna. At'aha ndaha tsa mjena ts'ian ni xi nda, tunga najmi chúkjuahána b'a ts'ian.

19 Najmi ts'ian ni xi nda xi mjena ts'ian, tu sa ní ni ch'onk'un xi najmi mjena ts'ian.

20 Tsa ts'ian ni xi najmi mjena ts'ian, najmi ta an xi b'a títs'ihinna. Ngatitsun xi tijnajin nína xi b'a títs'íun.

21 Mankjinna ni xu'bi. Nk'ie nga mjena ts'ian ni xi nda, tu ni ch'onk'un xi tijnajihinna bitjuchji.

22 Tsjo maha animana kjuatéxumaha Ntiana,

23 tunga mankjihinna nga kj'ai kjuatéxuma títs'inxájin yjonintena, kui xi kjuatéxumaha ngatitsuun. Kui xi kjánkò kjuatéxuma xi tsjániyáha kjuankjintak'unna. F'akj'ánijéna kò ts'in mana nda nubayáha.

24 ¡Nima rú ts'ihinna! ¿Yá xi kuasinkona tu xi kama ndáhi ra yjoninte xu'bi xi títsjana ngabaya?

25 ¡Tsjaha máb'achjhi Ntiana! Nda Ntiana Jesucristo kits'in ndaina. Títs'inchjén kjuankjintak'unna nga tint'e'éhen kjuatéxumaha Ntiana, tunga xi nkúhu nku nda, kjuatéxumaha ngatitsuun tint'e'éhen.

8

B'i ts'ín tsakúya Pablo nk'ie nga Espirituhu Ntíaná ts'ínk'íéntu tík'unná

¹ Kui b'a maha, najmi ta chumi nihi ta n'enijéhe ra xuta xi nkuhú mako Cristo Jesu,

² at'aha Espirituhu Ntíaná ts'ínk'íéntu tík'unkoná Cristo Jesu ko tsjáná nku kjuatéxuma xi ts'ín ndáiná kjuatéxumaha ngatitsuun ko ngabayoo.

³ Ni xi najmi kamaha kits'ín kjuatéxuma xi kin'ekjas'ehe Moise at'aha asuntee y'aha ra xuta ko najmi kamaha ts'íintjusun ni xi tjít'a, kui nihi xi kits'ín Ntíaná nga kits'ín nibá Ntíhi. Ntíu kik'a yjoninte xi nkúhu yjoninte ngatitsuhun xuta tu xi y'échjintjaihi ngatitsuun. B'a ts'ín kik'ojennkihi Ntíaná ngatitsun xi tijnajihin xuta.

⁴ B'a kits'ín Ntíaná tu xi kuitjusuhun ajinná ni nda xi banki kjuatéxumoo, ná xi najmi ta tintsubahaná xi nkú ts'ín mjehe yjonintená. Tintsuba nínáá xi nkú ts'ín mjehe Espirituhu Ntíaná.

⁵ At'aha xi asuntee y'aha ra nga tjintu, kui xi ni xi ts'e asuntee ts'ínkjink'un, tunga xi Espirituhu Ntíaná y'aha ra nga tjintu, kui xi ni xi ts'e Espiritu ts'ínkjink'un.

⁶ Xi ni xi ts'e asuntee ts'ínkjink'un, kui xi kuayá, tunga xi ni xi ts'e Espirituhu Ntíaná ts'ínkjink'un, kui xi k'úéntu tík'un ko s'ehe kjuajyu.

⁷ At'aha xi ni xi ts'e asuntee ts'ínkjink'un, kui xi unkie Ntíaná. Najmi tjintunkí kjuatéxumaha Ntíaná ko najmi maha tsa b'a incha ts'ín.

⁸ Xi asuntee y'aha ra nga tjintu, kui xi najmi maha ts'ín ni xi tsjoho Ntíaná.

9 Tunga máha jun, ja najmi ta asuntee y'ahanuu nga tintsu_{oo}. Espirituhu ní Ntíaná y'anuu nga tintsu_{oo} tsa kjuaxi nga kui xi tijnajinnuu. Xi najmi tijnajihin Espirituhu Jesucristo, kui xi najmi Jesucristo ts'ehe.

10 Tunga tsa Cristo tijnajinnuu, tsuhu ra nga Espirituhu tits'ínk'íentu tik'unnuu ko ja naxu tsichumo nginkun Ntíaná, ndaha tsa ngatitsuun ja kits'ínk'ien yjonintenuu.

11 Tsa Espirituhu xi kits'ínkj'áiyaha Jesu ngabayoo tijnajinnuu, ta kuihi xi kits'ínkj'áiyaha Jesu ta ts'ínk'íentu tik'un yjonintenuu xi maha 'me. B'a ts'ínkonuu Espirituhu Ntíaná xi tijnajinnuu.

12 Kui b'a maha, ja nts'e, ja najmi ta tihin tsa kuintsubaá xi nkúhu xuta xi ts'in ni xi mjehe yjonintee.

13 At'aha tsa kuintsuboo xi nkúhu xuta xi ts'in ni xi mjehe yjonintee, kuayó. Tunga tsa Espirituhu Ntíaná n'ek'ienkohonu ni xi mjehe yjonintenuu, kuintsuba tik'un.

14 Ngayjee xi Espirituhu Ntíaná bakú niyáha, kui xi ntíhi Ntíaná.

15 At'aha Espiritu xi kin'ekjóhooon najmi kits'in manuu xuta musuhu kjuabinkjuun. Kits'in ma nínuu Ntíhi Ntíaná ko ts'in nga: "Na'mi ichi", k'úhiin Ntíaná.

16 Kui Espirituhu Ntíaná nkuhú mako animaná nga tsuya kixi nga ñá xi ntíhi Ntíaná.

17 Tsa ñá xi ntíhi Ntíaná, ta sakúná ni xi ts'e. Jesucristo n'ekj'ínkoóho ni xi ts'e Ntíaná. Tsa nd'ai tibatjajaán kjuanima xi j'ajin, ta sakúná kjuachánkaha.

B'i ts'ín tsakúya Pablō nk'ie nga tichuyáhaá nistjin nga Ntíaná ts'ín ma kikjinná ntíhi

¹⁸ B'a mana nga najmi chumi nihi kju'a'un xi tibená nistjin nd'ai tsa ch'achubakohóná kjuachánkahá Ntíaná xi kama chjiná askahan.

¹⁹ Ngayjee ni xi kits'ínnda Ntíaná tíncha kuyá ko 'yún mjehe nga s'ejña chji yá xutaha xi ntíhi Ntíaná.

²⁰ At'aha ni xi kamandoo najmi ta tjíhin ra nga'yún xi kis'ehe nga tjuhun. Najmi kui kama mjehe nga b'a kamat'ain. Ntia níná b'a ts'ín y'énda nga b'a kamat'ain. Tunga ta tókuyahá ra

²¹ ni xi kamandoo nistjin nga najmi ta kuatsúhun. Tókuyáha nk'ie nga kama ndaíhi ch'á xi y'anji, nistjin nk'ie nga b'a ts'ín kama ndaíhi xi nkú tsjo ts'ín kama ndaíhi ntíhi Ntíaná.

²² Yaá nga santaha nd'ai un tibehe ngayjee ni xi kits'ínnda Ntíaná, xi nkúhu nku tachjuún xi tsíhin ntí.

²³ Ko najmi tu nku kui xi un tibehe. Ta un tibená ko ñá. At'aha ja tijnajinná Espirituhu Ntíaná. Ja kik'ai títjunná ajíhin ngayjee ni xi n'ekjáiín askahan. Nkjún tibehe animaná nga tichuyáhaá nistjin nga ts'ín ma kikjinná Ntíaná ntíhi, nistjin nga n'ek'anki yjonintená.

²⁴ At'aha ja kin'ek'ankiná ko tichuyáhaá ni xi sakúná, tunga tsa ja kisuya ntsáá ni xi tichuyáhaá, najmi ta tichuyá saha raá ni xu'bo. ¿At'aha yá xi kuyáha ni xi ja tijnaha?

²⁵ Tunga tsa tichuyáhaá ni xi najmi kjee yaá, tjíhin nga chuyáhaá santa nkúhu nga n'ekjáiín.

²⁶ Ta basinkóná Espirituhu Ntíaná, at'aha najmi ndjá tjíntuyáná. Najmi yaá ni xi kuincháá,

tunga Espirituhu ní Ntíaná bankintjáiná. Nk'ie nga nchjantjai un'unná Espiritu nginkun Ntíaná, najmi tjin én xi kuixinyahaná xi nkú tsu.

²⁷ Ntíaná xi be animaha xuta, kui xi be mí xi mjehe ts'ín Espiritu. At'aha xi nkú ts'ín mjehe Ntíaná, b'a ts'ín banki Espiritu nga nchjantjai xuta xi Ntíaná kikjats'e.

B'i ts'ín tsakúya Pablo xi nkú ts'ín tjoná Ntíaná

²⁸ Yaá nga ngayjee ni xi mat'ain xuta xi incha ts'intjo Ntíaná, Ntíaná ts'inchjén niu ngandaha xuta xu'bo. Ntíanáhá j'ájihin xuta xu'bo at'aha b'a ts'ín kama mjehe.

²⁹ At'aha xuta xi kieke títjun Ntíaná, ta y'enda títjun nga b'a ts'ín s'eyaha xi nkúhu Ntíhi, tu xi kui Ntíu kamaha Ntí tjun ajihin já nts'e xi nkjin maha.

³⁰ Kó xi y'enda títjun Ntíaná, ta j'ájin. Kó xi j'ájin, ta kits'ín nga tsichu ma naxu nginkun. Kó xi kits'ín nga tsichu ma naxu nginkun, ta kitsjáha kjuachánka.

³¹ Kui b'a maha, ¿nkú kuixín sahaná? Tsa Ntíaná makoná, ¿yá xi ngjuai kontraná?

³² Kui xi ja y'éjña nga tu nkú tsjáhá Ntíhi. Kits'ínkjas'en Ntíhi nga kin'ek'ien ngandaná. Kui nga tsa kitsjáná Ntíhi, ¿nkú ts'ín najmi ta tsjáhaná ngayjee ni xi tjin?

³³ ¿Yá xi kamaha ts'ínk'anji jé xuta xi Ntíaná j'ájin? Ntíaná kits'ín nga naxu xuta xi ts'e.

³⁴ ¿Yá xi b'a kuitsu nga ngatitsun y'a? Cristo Jesu k'ien kó j'áíya ngáha ra ngabayoo kó tijnat'aha Ntíaná nd'ai nga tbankintjáiná.

³⁵ Tjohó ñá Cristo. ¿Yá xi kamaha kjé'aná kjuatjohó? ¿A kjuanimá? ¿A kjuaboo? ¿A

kjua'unchoo? ¿A kjintío? ¿A tu ngat'aha nga x'aán? ¿A ni ch'onk'un xi mat'aán? ¿A ra ngaha n'ek'ienná?

³⁶ B'a ma xi nkú ts'ín tjit'a éhen Ntíaná:

Ngat'a ts'i tehente tintsubajiin ngabayoo.

Xi nkúhu chutsanka xi n'ek'ien, b'a ts'ín baseni jóo.

³⁷ Tunga ajihin ngatentee ni xu'bi xi kits'intjoná ta ts'ín nga tu sahá 'yún n'e ngana saá.

³⁸ At'aha behe k'an nga najmi tjin xi kamaha kjé'aná kjuatjoho Ntíaná, ndaha tsa kuayáa ko ndaha tsa kuintsuba tik'aán, ta ndaha ntitsjee ko xi batéxuma ko xi tjihin nga'yún, ta ndaha ni xi tíma nd'aj ko xi kama askahan,

³⁹ ta ndaha ni xi nk'a ko xi nanka, ta ndaha nku ni xi kits'ínnda Ntíaná. Najmi tjin xi kamaha kjé'aná kjuatjoho Ntíaná, kjuatjo xi tsakúchjiná nga kitsjáná Nda Ntíaná Cristo Jesu.

9

B'i ts'ín tsakúya Pablo xi nkú ts'ín Ntíaná j'ájin xuta xi ntje judio tjeheh ra

¹ Cristo be nga kjuaxi ni xi tíxian. Najmi tib'anacha. Ko Espiritu Santo b'a títuna nga b'a tjin ni xi tít'inkjihin k'an.

² Tjin babana ko ixí tíneyahá tíma animana.

³ Tsa kama kai, mjena tsa santaha an kama nku xi najmi nda nginkun Ntíaná ko tsa kjin kúátejñaha Jesucristo, tsa tu ahá ni b'a ts'ín kama kúásinka já nts'é, kui xi ntjena.

⁴ Xi ntje Israel tjeheh ra. Ntíaná kits'ín ma ntíhi. Y'ejñajihin ko tsakúchjihí kjuachánkaha. Ni y'éndako ntje cháha ko kitsjáha kjuatéxumaha. Tsakúchjihí xi

nkú ts'ín tjíhin nga ts'íintsjohó kó kitsúya títjuhún ni xi tsjáha.

⁵ Nkuhú ntje chá xi j'ájin Ntíaná, yo nibaha ra xuta Israel kó ajíhin xuto tsitjujin xi kits'ín niba Ntíaná nk'ie nga kik'a yjoninte xi nkúhu xuta. Kui xi Ntía xi batéxumaha ngayjee ni xi tjin. Kan'etsjo tehentehe tu nkjéhe ni. B'a katuma.

⁶ Tunga najmi j'a tiyahá éhen Ntíaná. At'aha najmi ngatentee xuta xi y'aha ra ntjehe Israel, tsa kui xi xuta Israel kikjin.

⁷ Kó najmi ngatentee xi y'aha ra ntjehe Abraham, tsa kui xi ntí kikjihin Abraham. At'aha Ntíaná b'a kitsúhu Abraham: “Ntje xi s'ehi Isaac nibaha ra.”

⁸ Kui xi tsuhu ra nga najmi ntí xi kis'ehe Abraham xi nkú ts'ín s'ená ntí, tsa kui xi ntíhi Ntíaná. Ntí xi kis'e níhi xi nkú ts'ín kitsúya títjun Ntíaná, kui xi kits'ínchíhi nga kui xi ntjehe Abraham.

⁹ At'aha kui én xu'bi xi kitsúya títjuhún Ntíaná Abraham: “Núni xi nkú ma nistjin xu'bi kuakuchíhi nga'yúnna. Nku ntíx'in s'ejñaha Sara.”

¹⁰ Kó najmi tu nku ni xu'bi kama. B'a ta kama mat'ain Rebeca nk'ie nga y'a ntí'yun. Kui xi kama chjuúhun Isaac xi ta ntje cháha xuta Israel.

¹¹ Ntíaná kinchjako títjuhún Rebeca nga kinchjaníjmíyaha ntíhi nk'ie nga najmi kjee tsin kó najmi kjee ts'ín ni xi nda kó a ra ni xi ch'onk'un, tu xi kuitjusuhun ni xi y'énda títjun Ntíaná nga j'ájin ntí xi kama mjehe. At'aha Ntíaná f'ájin xuta xi mjehe, najmi f'ájin tu ngat'aha ni nda xi ts'ín xuta.

¹² Kui nga b'a kitsúhu ra Rebeca: “Ntí xi tjun tsíun, musuhu ntí xi tsjénkiu kama.”

13 Xi nkú ts'ín tjí't'a éhen Nt̄ianá nga b'ì tít̄su: “Tjo kits'ian Jacob kò kits'in unkie Esau.”

14 Kui b'a maha, ¿nkú kuixíhinná? ¿A ts'ín Nt̄ianá ni xi najmí naxu t̄jín? ¡Najmi! ¡Ndaha tsa mí yjehe!

15 At'aha b'a kitsúhu Moise: “Kama n̄imana xi mjena nga kama n̄imana, kò kuase n̄imaha xi mjena nga kuase n̄imaha.”

16 Kui b'a maha, najmi ngat'aha tsa ni xi mjená kò tsa ni nda xi t̄ín'eé, tsa kui k̄uaha nga nda ts'ínkohoná Nt̄ianá. Nda ní ts'ínkoná at'aha ma n̄imaha ñá.

17 At'aha b'ì ts'ín tjí't'a má nga b'a kitsú Nt̄ianá nga kinchjako nda faraon: “Kitsja xáha t̄u xi kuakuchihina nga'yúnna kò t̄u xi cháhana nga ngúsuhun asuntee.”

18 Kui b'a maha, Nt̄ianá ma n̄imaha ra xi mjehe nga kama n̄imaha kò ts'ín ndjá an̄imaha xi mjehe nga ts'ín ndjá an̄imaha.

B'ì ts'ín tsakúya Pablo xi nkú ts'ín Nt̄ianá bakúchji k̄uakjahan kò k̄uatsentaha

19 Kutsa b'ahá kuixínní: “¿Mí nihi xi ts'ínnijéhená Nt̄ianá yo n̄i ma? At'aha, ¿yá xi ma fi kontraha ni xi mjehe Nt̄ianá?”

20 ¿Yáhá ni ji nda, tsa kuinchíhi kuenta Nt̄ianá? Nku ndjii najmi ma: “¿Á b'a n'e kin'endahaní?”, tsa kuitsuhu xi kits'índaha.

21 ¿A najmi t̄jín ra kixi nda xi ts'ínnda ndíu nga ts'íinko nintee xi nkú ts'ín mjehe? Ta kuihi nintee kama ts'ííndako nku ndjii xi sasíña tsjo kò nku xi n'echjén tehente.

22 Nt̄ianá mjehe nga kuakúchji k̄uakjahan kò nga k'uéña chji nga'yuhun. Tunga tít̄s'ín

chúkjuaha kō tít's'íntsentakō xutā xi nībajennehe kjuākjahan, kui xi xá n'ekjehe.

²³ B'a tít's'ín Ntíaná tū xi cháha rá xi nkú ts'ín chánka kjuächánka xi t'ínkōhō xutā xi tíma nímaha, xutā xi ja y'énda títjun nga tsjáha kjuächánkaha.

²⁴ Ná xutā xu'bo. Ntíaná j'ájinná najmi tū nku ajihín xutā xi ntje judiō tjeheñ rá, tū sa ní kō ta ajihín xi najmi ntje judiō tjeheñ rá.

²⁵ B'a kama xi nkú ts'ín y'ét'a éheñ Ntíaná nda profeta Osea nga b'í tít'su:

Xutā xi najmi xutāna, kui xi ts'in ma xutāna.

Kō xi najmi kits'intjá, kui xi ts'intjá.

²⁶ Kō xi má nga b'a kik'ihín xutā:

“Jun xi najmi xutāna mahanu”,

b'a k'úúin nga kui xi ntíhi Ntíaná xi t'íña t'ík'uun.

²⁷ Kō b'a ta kitsú nda profeta Isaia nga kinchjanijmíyaha xutā Israel: “Ndaha tsa b'a ts'ín nkjin maha xutā Israel xi nkú joyaha tsumí xi t'índai ntáchak'uun, tunga tū chubahá xi n'ek'anki.

²⁸ At'aha ja ts'íntjusun xatí Ntíaná ni xi kitsú nga kama nga ngúsuhun asunntee.”

²⁹ Xi nkú nga ta kitsú títjun Isaia nk'ie nga b'í kitsú:

Tsa najmi y'éjña saná ntje Ntíaná xi t'íhín nga'yún, ja rá b'a ta kamat'aán tsakai xi nkúhu xutā Sodoma kō tsichu ma ráá tsakai xi nkúhu xutā Gomorra.

B'í ts'ín tsakúya Pablo yá xi naxu bichú ma nginkun Ntíaná

³⁰ Kui b'a maha, ¿nkú kuixíhinná? Xutā xi najmi ntje judiō tjeheñ rá, xi najmi tsangisjai nga naxu k'úéntu nginkun Ntíaná, kui xi naxu tsichu ma

nginkun Nt̄ianá. Kis'ejihin Nt̄ianá, kui nga naxu tsichu maha.

³¹ Tunga máha xuta xi ntje judio tjeheŋ ra, incha tsangisjái nga ts'íntjusun kjuatéxuma xi kin'ekjas'eheŋ Moise, tu xi b'a ts'in naxu k'úéntuhu nginkun Nt̄ianá, tunga najmi tsichukjuahá ra.

³² ¿Á b'a kamaha? At'aha najmi tsangisjái nga naxu k'úentu nginkun Nt̄ianá xi nkúhu xuta xi s'ejihin Nt̄ianá. Tu sa ní incha kama mjehe nga ts'íntjusun ni xi tjít'a kjuatéxumoŋ tu xi b'a ts'in naxu kuichú maha kai. Incha kisaténki ndjio xi saténki xuta.

³³ B'a kama xi nkú ts'in tjít'a:

An k'uejñá nanki Sion nku ndjio xi saténki xuta,
nku naxi xi ts'íinxuntuhu.
Tunga xi s'ejihin xi ts'in nibá,
kui xi najmi sakúhu kjuasuba.

10

¹ Jun já nts'e, nk'ie nga nchjaka Nt̄ianá, bankin-tjá xuta Israel, at'aha mjena nga n'ek'anki.

² At'aha kama xinya nga kui xi 'yún tíncha bangisjai ni xi ts'e Nt̄ianá, tunga najmi incha mankjihín ra xi nkú ts'in tjíhin nga incha ts'ín.

³ Najmi kamankjihin nga Nt̄ianá tu tsjáhá ra xuta xi s'ejihin nga naxu kama. Tu sa ní kuenta ts'e suba incha tsangisjai xi nkú ts'in naxu kuichú ma nginkun Nt̄ianá. Najmi kits'in nímakjua yjoho tsa ts'ínkjáihin nga Nt̄ianá tu tsjáhá ra xuta nga naxu kama nginkun.

⁴ At'aha tsichutjusun kjuatéxuma xi kin'ekjas'eheŋ Moise nk'ie nga j'ai Cristo, tu xi

naxu kuichú maha nginkun Ntíaná ngayjee xi s'ejihin.

B'i ts'ín tsakúya Pablo nk'ie nga ngayjee xuta xi s'ejihin Ntíaná naxu bichú ma nginkun Ntíaná

⁵ B'i ts'ín y'ét'a Moise xi nkú ts'ín naxu bichú maha xuta xi ts'íntjusun kjuatéxuma xi kin'ekjas'ehen Moise. B'i kitsú: “Xi ts'íntjusun ni xi tjt'a kjuatéxumoo, ngat'aha kjuatéxumoo sakúhu ra nga k'úéjña tík'un.”

⁶ Tunga b'ihí ts'ín y'ét'a ngá xi nkú ts'ín naxu bichú maha xuta xi s'ejihin Ntíaná: “Najmi tu b'i ts'ín n'enkjíntak'uin: ¿Yá xi ngjuainji ndjiojmi ján?” Tsuhu ra éin tsa n'e nibájen xi ts'íin niba Ntíaná ngajoho.

⁷ Ko b'i ta kitsú ya: “Ko najmi tu b'i ts'ín n'enkjíntak'uin: ¿Yá xi ngjuai kinte t'anankiu?” Tsuhu ra éin tsa chjúsíntjen xi ts'íin niba Ntíaná ngajoho ajihin xuta k'ien.

⁸ B'i kitsú Moise: “Tíjñat'a tiñahi éhen Ntíaná, tsu'bai ko animahi tíjñat'a.” Kui éin xi tít'enijmí nd'ai, éin xi tsu nga xuta tjihin nga s'ejihin Ntíaná.

⁹ At'aha tsa tsu'bai kuitjuhu nga n'ekie yjohi nga Jesu xi Nda Ntíaná, ko tsa ngayjehe animahi s'ejihin nga Ntíaná kits'ínkj'áíya ngáha ra Jesu ngabayoo, n'ek'ankihi.

¹⁰ At'aha ajin animaha ní xuta nibáha ra nga s'ejihin Ntíaná, tu xi naxu bichú maha. Ko ts'a bitjuhu nga b'a tsu nga Jesu xi Nda Ntíaná, tu xi n'ek'ankihi.

¹¹ B'i ts'ín tjt'a éhen Ntíaná: “Xi s'ejihin Ntíaná najmi sakúhu kjuasuba.”

12 At'aha nkuhú chasehe ra xuta xi ntje judio tjeheh ra ko xi najmi ntje judio tjeheh ra. At'aha nkuhú maha Nda Ntjaha ngayjee xuta ko tsjáha ngayjee xi kuinchjakohe kjuanchiná xi tjíhín.

13 At'aha b'i ts'ín tjít'a: "N'ek'anke ngayjee xi ts'ínkjáihín nga kui xi Nda Ntjaná."

14 Tunga xuta xi najmi kjee s'ejihín, ¿nkú ts'ín ts'ínkjáihín ra nga kui xi Nda Ntjaná? ¿Nkú ts'ín s'ejihín ra xi najmi kjee nt'é yáha kui? ¿Nkú ts'ín kuínt'éhe tsa najmi tjín xi k'uénijmíhi?

15 ¿Nkú ts'ín k'uénijmíhi xuta tsa najmi s'et'a xáha nga k'uénijmí? At'aha b'i ts'ín tjít'a: "Á b'a tsjo tjíhín nga f'aik'úhunná xi b'énijmíná én nda tsu."

16 Tunga najmi ngayjeehé xuta Israel kits'ínsihín én nda tsuhu Ntjaná. B'i kitsú Isaia: "Ji Ntja, ¿yá xi kis'ejihín én xi y'enijmí?"

17 Kui b'a maha, s'ejinná Ntjaná nk'ie nga nu'yáá éhen, ko nu'yáá éen nk'ie nga s'enijmíná Jesucristo.

18 Tunga b'ahá xian: ¿A najmi kinu'yáhá éen? Johon, kinu'yá. At'aha b'i ts'ín tjít'a: Nga ngúsuyun asuntee kinu'yá ntaha, santaha má fekuhu asuntee tsichu éhen.

19 Ko b'i ta xin ya: ¿A najmi incha kikiehé xuta Israel ni xu'bi? Tjun Moise b'i ts'ín y'ét'a éhen Ntjaná:

An ts'ian nga jun kama xintak'un
xi tu a xutahá,
ko ts'ian nga n'ekjankoo
xi najmi chumi nihi xi mankjihín.

20 Ko askahan kama k'un Isaia nga b'i ta ts'ín y'ét'a éhen Ntjaná:

Xi najmi tsangisjaina, kui xi kisakúhu an,

ko xi najmi kingjásjaiyana, kui xi tsakuchj́hi yjona.

²¹ Ngat'a ts'e xuta Israel b'i ts'ín tjít'a: “Nku nistjin ntanta kik'ana nga kingjentéhe ntsa nku naxinantá xi najmi nt'é'én ko si.”

11

B'i ts'ín tsakúya Pablo nk'ie nga ta tjín ajihin xuta xi ntje judio tjeheh ra xi ja ts'anki

¹ Kui nga b'a xihinna, ¿a kits'ín t'axíhín Ntíaná xutaha? ¡Najmi! ¡Ndaha tsa mí yehe! At'aha ta nda Israel ná, ntjehe Abraham. Ntje cháná Benjamin y'ahana.

² Najmi y'éjña t'axín Ntíaná xuta xi ts'e xi j'ájin tíjún. ¿A najmi yanú xi nkú ts'ín tjít'a xujun éhen Ntíaná má nga nda profeta Elia kinchjako Ntíaná ko tsatéjéne xuta Israel? B'i ts'ín tjít'a:

³ “Ji Ntia, ja kits'ínk'ien xuta xu'bi já profeta xi ts'i ko ja kits'ínkatsún nachan chjehi. Tu nkuhú an tíjña sa. Ta incha mjehe ta ts'ínk'ienna.”

⁴ Tunga b'ahá kitsú Ntíaná: “Ja kits'in ts'an yatu mi j'á xi najmi tsasinkúnch'int'aha ntia Baal.”

⁵ B'a ta tíma nistjin nd'ai. Tu ngat'aha kjuandaha Ntíaná tjintu sa chuba xuta xi Ntíaná j'ájin.

⁶ Tsa tu ngat'aha kjuandaha Ntíaná kichj'ajihin xutaj, tsuhu ra nga najmi kichj'ajin tu ngat'aha ni nda xi incha kits'ín. At'aha tsa tu ngat'aha ni nda xi incha kits'ín xuta kichj'ajihin, kjuandaha Ntíaná najmi ta chj́hi ra ma.

⁷ Kui b'a maha, ¿mí nihi xi kama? Najmi kisakúhu ni xi tsangisjái xuta Israel. Xi j'ájin ní Ntíaná, kui ní xi kisakúhu ni. Xingisoo kama ndjá animaha.

⁸ B'a kama xi nkú ts'ín tjí't'a: "Nt̄ianá kitsjáha xuta xu'bō kjuankjintak'un tiya, tunkun xi najmi skuekoḥo kō tjabaxínñju xi najmi kuint'ékoḥo santaha n̄istjin nd'aj̄."

⁹ Kō b'ī ta kitsú ya David:
Kasaténkikō s'íhi xuta xu'bō,
ta kuihi kats'ínndyjajih̄in kō kats'ínk'íéchj̄ih̄i.
¹⁰ Incha katuma k̄a tū xi najmi ta skuehe,
kō musū incha katuma sín.

B'ī ts'ín tsakúya Pablo nk'ie nga ta n'ek'anki xuta xi najmi ntje judío tjeḥen ra

¹¹ Kui nga b'a xihinna, ¿a tū niyá kis'entuhú xuta Israel nk'ie nga ksaténki? ¡Najmi! ¡Ndaha tsa mí yehe! B'ī ní kama. Tū ngat'ahā nga najmi kint'é'éhen Nt̄ianá xuta Israel, kui nga j'aihī ra én xi ts'ínk'ankih̄i xuta xi najmi ntje Israel tjeḥen ra, tū xi b'a ts'ín kama xintak'uhun xuta Israel.

¹² Tsa tū ngat'ahā nga najmi kint'é'éhen Nt̄ianá xuta Israel, tsa kui ngat'oḥo kisakúhū ra kjuanchináhā Nt̄ianá xuta xi t̄jín asuntee, kō nk'ie nga ksaténki Israel kisakúhū kjuanchináhā Nt̄ianá xuta xi najmi ntje Israel tjeḥen ra, ¿nkú sa kama nk'ie nga sakú ngáhā ra xuta Israel ante xi ts'e nginkun Nt̄ianá?

¹³ Tínchjakonuū jun xi najmi ntje Israel tjeḥennuū. Nt̄ianá kits'ín mana ndā postruh̄u xuta xi najmi ntje Israel tjeḥen ra kō xinya kjuachánkahā xána.

¹⁴ B'a ts'ian tsa tū ahá ni ngat'anuū kama xintak'uhun ntjenā, tsa tū xi b'a ts'ín n'ek'ankih̄i k'uā.

¹⁵ At'ahā kisakúhū kjuajyu nginkun Nt̄ianá xuta xi t̄jín asuntee nk'ie nga kin'e t'axín xuta Israel.

Kui nga, ¿nkú sa kama nk'ie nga n'ekjáín ngáha ra? Sakú ngáha ra nga k'úéntu tík'un xuta k'ien.

¹⁶ Tsa tsje nginkun Ntíaná na'yu xi n'endakoho ninkuan chje xi 'bai tjuhun Ntíaná, tsuhu ra nga ta tsje ngayjee na'yu ninkuon. Tsa tsje nginkun Ntíaná kjamaha nku yá, tsuhu ra nga ta tsje tjiaha.

¹⁷ Xuta Israel, kui xi nkú joyaha tjia xi kitit'áha nku yá olibo, ko ji xi nkú joyaha tjiaha yá olibo jñá. Tunga jihí kis'et'ai antehé tjia xi kitit'óo ko kisakút'aihi kjuatik'un xi tijnajin kjamaha yá olibo xi ndoo.

¹⁸ Tunga najmi tu nk'ahá n'esjei yjohi, tsa b'a kuixín nga ji xi 'yún nda sai nga tjia xi kitit'óo. Tsa mjehi nk'a n'esjei yjohi, tu sahá n'ekj'áitsjein nga kjamaha yoo y'aha ri. Najmi ji xi kich'ai kjamó.

¹⁹ Kutsa b'ahá kuixín: “Tu xi an s'et'ahana antehé yoo, kui nga kitit'áha.”

²⁰ B'a tjin. Tunga kitit'áha at'aha najmi kis'ejihin Ntíaná, ko ji ndjá tisinjnai nd'ai at'aha s'ejihin. Kui nga najmi tu n'enkjintak'uhunni tsa ji xi 'yún nda sai. Tu sa ní tinkjuín Ntíaná.

²¹ At'aha tsa Ntíaná najmi kits'ínndyjat'aha tjia xi ndaha yá olibo, ¿a tu kjehé ji ts'ínndyjat'ahi nga tu kisut'aní yoo?

²² Chasei xi nkú ts'ín nda ko ndjá ts'ínko Ntíaná xuta. Ndjá kits'ínko xi kisaténki ko ji nda kits'ínkóhi. Ko nda ts'ínkóhi tsa tu nku kuinchunjinní kjuandaha. Tunga tsa najmi b'a n'ei, ko ta ji kuichát'ahi.

²³ Ko ta xuta Israel, tsa ngjuajkj'áha ra animaha ko s'ejihin Ntíaná, k'uai ngáha ra ante xi ts'e. At'aha tjihin nga'yún Ntíaná nga tsjá ngáha ra ante xi ts'e xuta Israel ajihin yá olibo.

24 At'aha ji xi nkú joyaha tjiaha yá olibo jñá tu kis'et'aní antehé yá olibo xi ndoo. Kui b'a maha, ¿a najmi kamahá k'uaí ngáha ra xuta Israel antehé? At'aha kui xi tjia xi ndoo.

B'i ts'in tsakúya Pablo nk'ie nga kama nimaha Ntíaná ngayjee xuta

25 Jun já nts'e, mjena nga choo nku ni xi y'éjña 'ma Ntíaná, tu xi najmi nk'a n'esjehenu yjonuu. K'ua xi tjín ajihín xuta Israel kama ndjá animaha. B'a kama santa nkúhu nga sakúntehé nginkun Ntíaná ngayjee xuta xi najmi ntje Israel tjeheh ra. Kui xi tjíhin nga n'ek'anki.

26 Nk'ie nga ja b'a kama, ta n'ek'anki ngayjee xuta Israel. Xi nkú ts'in tjít'a éhen Ntíaná: Nanki Sion nibaha xi ts'ínk'anki xutana, kui xi kjéxihín kjuach'onk'uhun ntjehe Jacob.

27 Kui nij xi y'endáka xutana nga ts'ian, nk'ie nga ja kjexián ngatitsuhun.

28 Najmi mjehe xuta Israel én nda tsuhu Ntíaná. Ngandanuu xuta kontraha Ntíaná tsichu ma. Tunga tjohó ra Ntíaná xuta Israel tu ngat'aha nga Ntíaná j'ájin ntje cháha.

29 At'aha najmi kje'á Ntíaná ni xi tsjá ko ta ndaha najmi ts'in t'axín xuta xi j'ájin.

30 Nistjin nk'ie, najmi kinu'yá'óhoon Ntíaná, tunga tibase nimahanuu nd'ai tu ngat'aha nga najmi kint'é'én xuta Israel.

31 Ko santaha nistjin nd'ai najmi tint'é'én xuta Israel, tu xi ta chase nimaha ra tu ngat'aha nga jun kichase nimanuu.

32 B'i tjíhin ra nij. Ndaha nku xuta xi tjín najmi nt'é'éhen Ntíaná. Ntíaná y'éjñaha xuta nga najmi

kint'é'én, tu xi nkuhú nga kama nimaḥa ra ngayjee.

B'i ts'ín kits'intsjohō Pablo Ntjaná

³³ ¡Á b'a nkjún ts'ín chánkaha kjuanchináha Ntjaná! ¡Á b'a nkjún ts'ín nanka ts'ínnkjink'uhun ko á b'a nkjún ts'ín tsehe kjuankjintak'uhun! Najmi tjín xi mankjihin ni xi ts'ín Ntjaná ko najmi ch'a maha tsuya á b'a ts'ihin.

³⁴ At'aha, ¿yá xi be xi nkú ts'ín ts'ínkjink'un Ntjaná? ¿Yá xi kitsúyaha ni xi tjihin nga ts'ín?

³⁵ ¿Yá xi kits'ínkienyaha tsa mí nihi, tu xi Ntjaná tjihin nga ts'ínk'óya ngáha ra?

³⁶ At'aha Ntjaná kits'innda ngayjee ni xi tjín. Ngat'aha ko nga tsjohō tjihin niu. ¡N'ekie yjoná nga tjihin kjuachánka Ntjaná tu nkjéhé ni! B'a katuma.

12

B'i ts'ín tsakúya Pablo xi nkú ts'ín tintsubaá nd'ai nga ja yjankiá Cristo

¹ Kui b'a maha, já nts'e, at'aha tibase nimaná Ntjaná, kui nga tibankehinu nga ngayjehe tak'un n'etsjohō Ntjaná, nga n'ekjas'ohoon yjonuu xi nkú joyaha nku chje tik'un xi tsje ko xi sasihin Ntjaná.

² Najmi tu bintsuboo xi nkú ts'ín tjintu xuta asuntee. Tu sa ní n'ek'óntjaiyo yjonuu xi nkú ts'ín Ntjaná tít's'ín tsetse kjuankjintak'unnuu, tu xi b'a ts'ín kamankjihinnuu ni xi mjehe Ntjaná, ni xi nda, xi sasihin ko xi ja nda tsichu ma.

³ Nga nkúnkú jun tínchjakonuu, at'aha Ntjaná kitsjana kjuandaha. Najmi tu nk'a n'esjo yjonuu.

Nkú ní ts'ín tjiyanuu. B'a ts'ín n'esjo yjonuu xi nkú ts'ín kitsjánuu Ntíaná nga s'ejinnuu.

⁴ At'aha xi nkú ts'ín nkjin tikjá maha ni xi y'aha yjonintená kō xi nkú ts'ín kj'ai kj'ai xá xi kik'aihi nga nkúnkú,

⁵ b'a ta joyaha ñá. Nkjin mahaná tunga nkuhú yjoninte kamakaá Cristo. Nga nkúnkáá kich'aá xinkjá.

⁶ Kj'ai kj'ai ni xi maná n'eé. Kui kjuanda xi kitsjáná Ntíaná nga nkúnkáá. Xi Ntíaná kitsjáha éhen tu xi ts'inkjas'ehen, kui xi katsúya éhen Ntíaná xi nkú ts'ín kik'aihi nga s'ejihin.

⁷ Xi kik'aihi nga kuasinko xuta, kui xi katasinko xuta. Xi kik'aihi nga kuakúya, kui xi katakúya.

⁸ Xi kik'aihi nga tsjá nga'yún, kui xi katsjá nga'yún. Xi kik'aihi nga tsjá toon, kui xi ngayjehe animaha katsjá toon. Xi kik'aihi nga tsjén títjun, kui xi kixi katjiko xaha. Xi kik'aihi nga kuase nimaha xuta, kui xi tsjo kat'ehe nga b'a kats'ín.

B'i ts'ín tsakúya Pablo nk'ie nga kjuatjo tíñajinná

⁹ N'etjō kjuaxi xinkiu. Najmi tu n'esihun ni xi ch'onk'un. Ni xi nda ch'a ntsja ntsjon.

¹⁰ B'i ngján n'etjō xinkiu xi nkú ts'ín tjohō xinkjín xi nts'e maha, at'aha nts'ohó mahanuu xinkiu. 'Yún chanjún so xinkiu.

¹¹ Kixi n'oo ni xi t'n'o kō najmi tu n'ets'o. Tu xí tsjohó kat'ehe animanuu nga n'oo ni xi mjehe Nda Ntíaná.

¹² Tsjo kat'enuu nga chúyohō ni xi tsjánuu Ntíaná. N'echúkuo kju'a'un xi tíyo. Najmi tu n'ekj'ajiun nga chubakō Ntíaná.

¹³ Tjohoon ni xi ndyjat'áha xuta xi yjanki Ntíaná ko nda n'ekjóhooon xi kuichúk'unnuu.

¹⁴ Chubantjo xuta xi tjennki unkienuu. B'a t'ihuun Ntíaná nga nda kats'ínkohó. Najmi tu ni xi najmi nda binchinó nga kamat'ain.

¹⁵ Tsjo kat'ekonuu xi tsjo tjíhin. Ch'íiko xi tíkjintá.

¹⁶ B'i ngján nda chasohó xinkiu. Najmi tu nk'a katumanuu yjonuu. Tu sa ní nda chasohó xuta x'an. Najmi tu xuta nkjink'un n'e ma suboo yjonuu.

¹⁷ Najmi tu ch'on n'ohoo xi ch'on títs'innuu. Chasé nínú xi nkú ts'ín nda kama n'ohó ngayjee xuta.

¹⁸ Tsa kama, tsa aya ntsoo tíña, kas'ekonuu kjuajyu ngayjee xuta.

¹⁹ Já nts'ena, najmi tu n'e ngajoyo ni xi tín'enuu. Aya ntsja ní Ntíaná t'ejñayo xi b'a títs'íun. At'aha b'i ts'ín tít'a éhen Ntíaná: “Ahán xi k'uasjé chjíá, an xi tsjahá chjíhi. B'a títsu Ntíaná.”

²⁰ B'i ta ts'ín tít'a ya: “Tsa tíma bjohó nda kontrahí, tjeihin ni xi kjine. Tsa tíma xintáha, tjeihin ntá xi k'úi. At'aha tsa b'a n'ei, tu ni xí kama subahá ra nda kontrahí.”

²¹ Najmi tu 'bainteí tsa kjuach'onk'uun xi ts'ín nganahi. Tu sa ní ni xi nda n'ei. B'a ts'ín n'e nganaha ri ni ch'onk'uun.

13

B'i ts'ín tsakúya Pablo nk'ie nga tjíhin nga chankjún xi batéxuma

¹ Ngayjee xuta tjíhin nga kuint'é'éhen xi batéxuma. At'aha xá xi tjíhin xi batéxuma nginkun Ntíaná nibáha ra. Ntíaná y'éjña xóo.

² Kui nga xi fi kontraḥa rā xi batéxuma, kui xi tífi kontraḥa ni xi ja y'éña Ntíaná. Kō xi b'a títs'ín, ta kuihi títangisjai suba nga n'ekokjuaha.

³ At'aha já xi batéxumoo najmi tjintu tsa tu xi ndjá ts'ínkoho xuta xi nda ni xi títs'ín. Xuta xi najmi nda ni xi títs'ín, kui xi b'a kats'ihin. ¿A mjehi nga najmi ndjá ts'ínkōhi já xi batéxumoo? Tsa b'a, nda n'ei, kō nda ts'ín kuasehi já xi batéxumoo.

⁴ At'aha ngandahi ní títs'ínxát'aha rā jóo Ntíaná. Tunga tsa ni xi najmi nda tín'ei, tjihin nga kuinkjún tu ngat'aha ni xi ts'ínkōhi jóo. At'aha najmi tu a tjihin xá jóo. Ntia níná títs'ínxát'aha tu xi ts'ínk'íechjīhi kō ts'ínkokjuaha xi ch'on títs'ín.

⁵ Kui nga tjihin nga kuinú'yá'éhen raá já xi batéxumoo, najmi tu ngat'aha ni tsa ts'ínk'íechjíná ni xi n'ee. B'a ní n'ee tu xi je s'eyaha kjuankjintak'unná nginkun Ntíaná.

⁶ Kui kjuaha nga b'echjīhinu ni xi f'áchjínuu já xi tjihin xá, at'aha kui xi tíncha ts'ínxát'aha Ntíaná. Xaha tíncha ts'ín.

⁷ Tjohoon ni xi kanéhe nga nkúnkú jóo. T'echjīhuu xi f'áchjintjai ni xi tjinnuu kō xi f'áchjintjai ch'á nga ts'ínxát'aha já Roma. Chankjún xi nkú ts'ín tjihin nga chankjún, kō nda n'esihuun xi nkú ts'ín tjihin nga nda n'esihin.

B'i ts'ín tsakúya Pablo mí kjuaha nga n'etjohoná xinkía

⁸ Najmi tu chumi nihi xi katsjennuu. Tjohoon kjuatjo xinkiu. At'aha xi tjoho xinkjín, kui xi títs'íntjusun ngayjee kjuatéxumaha Ntíaná.

⁹ B'i ts'ín tjít'a kjuatéxumoo: “Najmi tu ch'at'aihi chjīhin. Najmi tu n'ek'iein animá. Najmi tu

n'ei ndyjé. Najmi tū fasihin ni xi tjihin xuta.”
 Kui kjuatexumoo ko ngayjee kjuatexuma xingisoo
 nkuhú bichú majihin kjuatexuma xu'bi: “N'etjói
 xutahi xi nkú ts'in tjohi yjohi.”

¹⁰ Xi tjoho xinkjin, kui xi najmi ch'on tít'síhin.
 Kui nga bichútjusuhun kjuatexumoo ajihin xuta xi
 tjihin ra kjuatjo.

¹¹ B'a n'oo at'aha yo nistjin xi kich'aá nd'ai. Ja
 chubaha nga n'ek'áhaá yjoná nga kuintsuba ndaá.
 Ja 'yún chuba ndyjaha nd'ai nk'ie nga Ntjaná
 ts'íink'ankiná. Najmi b'a ta tjin ndyjaha ra xi nkúhu
 nk'ie nga kis'ejinna.

¹² Ja ma kuichúhú chuba. Najmi ta n'ehe ná
 ngatitsun, ataha nk'ie nga ngatitsun n'eé, b'a joy-
 aha xi nkúhu tsa má jyuun tintsubaá. Ni xi nda
 n'eé. Kui xi b'a ta joyaha xi nkúhu tsa má ndzjen
 tintsubaá. K'úendaá yjoná tu xi kujimajihinná má
 ndzjeen.

¹³ Kixi tankinkaá yjoná xi nkúhu xuta xi tjíma
 nga nistjiun. Najmi kuintsubaá tsa tu xi s'ihiná
 ko chineé. Najmi tjihin nga chuba súntukonáá
 xinkia ko tsa n'ejnu n'et'aá. Ko ta ndaha najmi
 tu bixkjanakaá xinkia ko tsa kama xin k'aán ni xi
 tjihin.

¹⁴ Tu sa ní tinúngijiun yjonuu Nda Ntjaná Je-
 sucristo ko najmi tu n'enkjintak'un xi nkú ts'in
 n'ehenu ni xi mjehe yjoninte ngatitsuun.

14

*B'i ts'in tsakuya Pablo nk'ie nga najmi tjihin nga
 n'ek'anjiá je xinkia*

¹ Nda n'ekjóh_oon xi najmi ndjá síjñajin xi nkú ts'ín s'ejinná, k_o najmi t_u b'esik_o ngat'aha xi nkú ts'ín ts'ínnkjink'un.

² Tjín xi b'a ts'ín s'ejih_{in} nga ma kjine t_u mí nichinehé ni, k_o tjín ngá xi najmi ndjá síjñajin xi nkú ts'ín s'ejinná kui nga t_u xkahá kjinehe.

³ Xi kjine t_u mí nichinehé ni najmi tjíh_{in} nga ch'on ts'ín kuasehe xi b'éch'oh_o yjoh_o ni xi kjine. K_o xi b'éch'oh_o yjoh_o ni xi kjine najmi tjíh_{in} nga ts'íink'anji jé xi kjine t_u mí nichinehé ni. B'í incha kats'ín at'aha Nt_{ianá} ja kits'ínkjáih_{in} nga jo_o.

⁴ ¿Yáha ji xi t_{in}'ek'anjihinni jé ndá musu_hu xi kj'aí? Tsa ndjá síjña ndá musu k_o tsa tísaténki, Nda Nt_{iaha} kjinehe ni xu'bo. Tunga ndjáhá kuasijña, at'aha tjíh_{in} nga'yún Nda Nt_{ianá} nga ndjá ts'íinkasíjñaha.

⁵ Tjín xi b'a maha nga 'yún nkjún sa nku n_{ist}j_{in} nga kj'aí n_{ist}j_{in}, k_o tjín ngá xi t_u nku ch_uba maha n_{ist}j_{in}. Nkúnkú tjíh_{in} nga ts'ínnkjink'un sisin xi nkú ts'ín behe k'un.

⁶ Xi benkjún nku n_{ist}j_{in}, kui xi b'a ts'ín t_u xi benkjúhun Nda Nt_{ianá}. K_o xi kjine t_u mí nichinehé ni, kui xi b'a ts'ín t_u xi benkjúhun Nda Nt_{ianá}. Tsjáha máb'achjíhi Nt_{ianá} ngat'aha nichinehe. K_o xi b'éch'oh_o yjoh_o ni xi kjine, kui xi b'a ts'ín t_u xi benkjúhun Nda Nt_{ianá} k_o ta tsjáha máb'achjíhi Nt_{ianá}.

⁷ Najmi tjín ajinná xi kuenta ts'e suba tíjña t_{ik}'uhun k_o tsa kuenta ts'e suba 'mehe.

⁸ Tsa t_{int}suba t_{ik}'aán, Nda Nt_{ianá} t_{int}suba t_{ik}'uhunná. K_o tsa t_{ib}ayaá, Nda Nt_{ianá} t_{ib}ayahaná. Kui b'a maha, ndaha tsa t_{int}suba t_{ik}'aán k_o ndaha tsa t_{ib}ayaá, Nda Nt_{ianá} ts'ená.

⁹ At'aha kui kjuaha k'iehen Cristo ko j'áya ngáha ra ngabayoo, tu xi b'a ts'in kamaha Nda Ntíaha xuta k'ien ko xi tjintu tik'uun.

¹⁰ Ko máha ji, ¿á ji tichasehe ri tsa nda ko tsa najmi nda títs'íhin nda nts'ei? Ko ta, ¿á kinte n'esjeheni nda nts'ei? Katumankjihin nga ndyjun nkiní kuasehe Ntíaná mí nihi xi kin'eé nga nkúkáá.

¹¹ B'i ts'in tjít'a éhen Ntíaná:
 Ahán xi tíjña tik'an, títsu Ntíaná.
 Kuasínkúnch'in ngayjee xuta nginkán,
 ko ngayjee ts'ínkie yjoho nga an xi Ntía.
¹² Kui b'a maha, nga nkúkáá n'ekjas'eheén kuenta Ntíaná ni xi kin'eé.

B'i ts'in tsakúya Pablo nk'ie nga najmi tjihin nga n'endyjajihín xinkíá

¹³ Kui nga najmi ta chasehe raá tsa nda ko tsa najmi nda ni xi títs'ín xinkíá. Tu sa ní chaso xi nkú ts'in najmi n'endyjajihun nda nts'o ko xi nkú ts'in najmi n'ekijnejiun ngatitsun.

¹⁴ S'ejinna Nda Ntíaná Jesu ko be nga ndaha nku ni najmi chuntí nginkun. Tunga tsa tjín xi: “Chuntí ni xu'bi nginkun”, tsa kuitsu, tu nginkun ndohó chuntí niu.

¹⁵ Tunga tsa tu ngat'aha ni xi tichinei títs'ínndyjajihín ra yjoho nda nts'ei, najmi ta tín'etjohoni nda nts'ei ma. Najmi tu 'bainte tsa tu ngat'aha nichinehi ndyjaha xuta xi k'ienntjáhi Cristo.

¹⁶ Najmi tu 'bainto tsa ch'on ts'in kuinchjayane xuta ni xi n'ekjóhooon nga nda.

¹⁷ At'aha ni xi chineé ko ni xi s'já najmi chumi ni chjhi ra. Nk'ie ní Espiritu Santo tsjáná nga

naxu kuintsubaá nginkun Ntianá ko nga s'ená kjuajyu ko kjuatsjo, kui ní ni xu'bi xi bakúchji nga ja tsitjas'enjián nga Ntianá tibatéxumaná.

18 Xi b'a ts'ín tijña nginkun Cristo, kui nij xi tsjohó Ntianá ko xuta ta nda ts'ín nchjayanehe.

19 Kui b'a maha, tinchísjaihiná xi nkú ts'ín s'ehená kjuajyu ko xi nkú ts'ín kuisinkaá xink*í*á nga saájián ni xi ts'e Ntianá.

20 Najmi tu ngat'aha nichineh*j* n'ekatsúhunni xá xi tits'ín Ntianá ajihin xuta xi ts'e. Kjuaxi k*ja*íhin nga je nginkun Ntianá ngayj*ee* nichine xi tijín, tunga najmi ndahá tijín tsa ch*ine*j nichine xi ts'iinkijneh*in* ngatitsun xuta xingisoo.

21 Tu sahá nda n'e*ei* tsa najmi ch*ine*i yjo ko tsa najmi s'i binu ko tsa najmi n'e*ei* ndaha nku ni xi ts'iinkijneh*in* ngatitsun já nts'e*i*.

22 Xi nkú ts'ín s'e*ij*hin ni xu'bi, tu ji b'a ts'ín kas'e*ij*hín ri nginkun Ntianá. ¡Á b'a nda t*ij*hin ts'e xi behe k'un nga nda tijín ni xi tits'ín ko najmi tits'innijéhe ra kjuankjintak'uhun askahan!

23 Tunga xi jo jan t*im*aha nga t*ik*jine tsa mí nihi, ta kuihi tits'ínk'anji j*e* yjoho, at'aha najmi tits'ín xi nkú ts'ín s'e*ij*hin. At'aha ngayj*ee* ni xi n'e*e* xi fi kontra xi nkú ts'ín s'e*ij*inná Ntianá, kui xi ngatitsun.

15

*B'i ts'ín tsakúya Pablo nk'ie nga t*ij*hin nga kuisinkaá xink*í*á tu xi saájihinná ni xi s'e*ij*inná*

1 N*á* xi ja nd*ja* tinchajián xi nkú ts'ín s'e*ij*inná najmi tu n'e*e* ni xi tu n*á* tsjo s*ub*aháná. T*ij*hin ni nga n'ek*ja*íh*in* xi najmi k*je*e nd*ja* t*in*chajin xi nkú ts'ín s'e*ij*inná.

² Nga nkúnkáá tjíhin nga n'eé ni xi tsjohō xinkjá kō ni xi ngandahā n'eé, tū xi saájihin xi nkú ts'ín s'ejinná.

³ At'ahā kō tā Cristo najmi ni xi tsjohō kits'ín. Ni xi tít'a ní éhen Ntíaná má b'a títsu kits'ínkjáihin: “Én ch'on tsu xi kitsúhi xutā, kui xi j'aisaténa.”

⁴ Ni xi kis'et'a nistjin nk'ie, kis'et'a tū xi kuakú nnyáhaná. At'ahā ajin xujun éhen Ntíaná sakújinná kjuatsenta kō sakú nga'yúnná tū xi chúyahā ráá ni xi tsjáná Ntíaná.

⁵ Ntíaná xi tsjáná kjuatsenta kō tsjá nga'yúnná, kui xi katsjánūu nga nkuhú n'enkjínk'un xi nkú ts'ín tjiyahā Cristo Jesu.

⁶ Nkuhú kas'eya animanūu kō nkuhú katuma ntanūu. B'a ts'ín n'ekieheñu yjonūu nga tjihin kjuachánka Ntiahā kō Na'mihí Ndā Ntíaná Jesu-cristo.

B'i ts'ín tsakúya Pablo nk'ie nga xutā xi najmi ntje judio tjeñen rá tsichujíhin én nda tsuhū Cristo

⁷ Kui b'a maha, b'i ngján nda n'ekjáihin ruu xinkju xi nkú ts'ín nda kits'ínkjáinnūu Cristo, tū xi s'ejña chjihi kjuachánkaha Ntíaná.

⁸ At'ahā an b'a tíxinnūu. J'ai Cristo ngandahā xutā xi ntje judio tjeñen rá. Tsakúchji nga ts'ín Ntíaná ni xi kitsú nga ts'ín. J'ai ts'intjusun ni xi kitsúya títjuhun Ntíaná ntje cháha xutā judio.

⁹ B'a ts'ín kō tā xutā xi najmi ntje judio tjeñen rá ts'ínkie yjohō nga tjihin kjuachánka Ntíaná, at'ahā kō tā kui kichase nimañā xi nkú ts'ín tít'a éhen Ntíaná:

Kui nga xínyahana kjuachánkahi ajihin xutā xi tjíntu asunntee,

ko séhe nga ts'intsoho.

¹⁰ Ko b'a ta ts'ín tjit'a ya:

Jun xuta xi tintsu_{boo} asuntee, n'etsjokoo xutaha Ntjaná.

¹¹ Ko b'a ta titsu sa:

N'etsjohoo Ntjaná ngayjee xuta xi tjintu asuntee.
Chanink'o Ntjaná ngayjee xuta naxinantá xi tjin.

¹² Ko b'a ta ts'ín y'ét'a nda profeta Isaiá:

Stjúkjá nda xi kama kjamaha Isai,
nda xi kj'uaitéxumaha xuta xi tjintu asuntee,
kui kama 'yún tak'un xuta.

¹³ Ntjaná xi tíma 'yún tak'aán, kui xi kats'intsejinye animanuu kjuatsjo ko kjuajyu, jun xi s'ejinnuu Ntjaná. Katsjá nga'yúnnuu Espiritu Santo tu xi tu nku ndjáhá kuinchajihinnu ni xi tíchuyóhoo.

B'i ts'ín tsakúya Pablo nk'ie nga kui xi nku nda postru xi ts'ínxájihin xuta xi najmi ntje judio tjehe_n ra

¹⁴ Behe k'an, já nts'e, nga kitsejihinnuu kjuanda ko kjuankjink'un, tu xi kama k'uai niyáha ruu xinkju.

¹⁵ Tunga tjihín ni xi tíma k'an tíb'et'á xujunnuu ei tu xi najmi n'echayahanu. At'aha Ntjaná kitsjana kjuanda xu'bi

¹⁶ nga an xi ts'inxát'aha Cristo Jesu ngandaha xuta xi najmi ntje judio tjehe_n ra. Tíb'enijmíhi én nda tsuhu Ntjaná xuta xi najmi ntje judio tjehe_n ra tu xi kuichú maha chje xi tsjoho Ntjaná, chje xi títs'ín tsje Espiritu Santo.

¹⁷ Tsjo mana nga nchjanijmíya xá xi kitsjana Cristo Jesu nga ts'inxát'aha Ntjaná.

18 At'aha najmi ma k'an nchja ni xi kj'ai, tu nkuhú xi nkú ts'in ts'inchjénna Cristo tu xi kuint'é'éhen ra Ntíaná xuta xi najmi ntje judio tjeheh ra. Cristo ts'inchjén ntana ko xana

19 ko nkjin tíkjá kjuankjún xi bakúchji nga'yúhún. Nga'yúhún Espiritu Santo b'a títs'íun. B'a ts'in jehena nga y'enijmía én nda tsuhu Cristo nanki Jerusalem ko santaha má nga 'mi Ilirico.

20 Y'enijmía én nda tsuhu Cristo ante má nga najmi kjee ch'a b'énijmíhi. B'a kits'ian at'aha najmi kama mjena y'esún saha xá xi kik'atuts'ihin xuta xi kj'ai.

21 Tu sa ní títs'ian xi nkú ts'in tjít'a éhen Ntíaná: Xi najmi kjee 'miyaha yáha kui, kui xi skuéhe. Ko xi najmi kjee nt'é yáha kui, kui xi kamankjihin.

B'i ts'in kitsúya Pablo nk'ie nga mjehe nguaisehe xuta ninku Roma

22 Nkjin niyá najmi kisakú niyána nga kama kfínsehenuu,

23 tunga nd'ai ja kama ndjuúna xá xi títs'ian ante xi tjín ei ko ta ja tjíhin nú nga mjena kfínsenuu.

24 Kui nga mjehena nga skuenuu nk'ie nga kfíán España, at'aha mjena yo kfian. Tsjo kamana nga kúátejñajinnuu chuba nistjin. Nk'ie nga kj'ua yo, tisinkonú nga ts'inndjaá niyána.

25 Tunga nd'ai nanki Jerusalem tífia. Xuta xi kikj'áts'e Ntíaná kfínsinka yo.

26 At'aha ngayjehe k'un xuta ninku xi tjín ante Macedoniá ko ante Akaya incha kits'ínsun toon tu xi ts'íinkjihí ra xuta x'an xi kikj'áts'e Ntíaná xi tjíntu Jerusalem.

27 Tsjo kamaha nga b'a incha kits'in. Ko kjuaxi nga tjeheh ts'e xuta xu'bo. At'aha nd'ai tits'inkjáihih xuta xi najmi ntje judio tjeheh ra ni xi ts'e Ntíaná, ni xi Ntíaná kitsjáha xuta xi ntje judio tjeheh ra. Kui nga xi najmi ntje judio tjeheh ra tjíhin nga kuasinkoho nga kuakjányako xuta xi ntje judio tjeheh ra ni xi tjíhin ei asuntei.

28 Kui b'a maha, nk'ie nga ja kama ndjuúhuna xá xu'bi ko nk'ie nga ja ts'inkjas'en ni xi kama ñjakúu, as'aíhí ní kfián Españá ko kj'ua má nga tintsuboo.

29 Be nga Cristo tu xí ndahá ts'ínkoná nk'ie nga kama ñjakáá.

30 Jun já nts'e, ngat'aha Nda Ntíaná Jesucristo ko ngat'aha kjuatjo xi tsjáná Espiritu Santo tibaninu nga chubantjainú nginkun Ntíaná. B'a ts'in n'ekohonú nga'yún.

31 Tinchíhuu nga najmi tu kasatéjña xuta xi najmi s'ejihin Nda Ntíaná xi tjintu ante Judea. Ko ta tinchíhuu nga xuta xi kikj'áts'e Ntíaná xi tjintu nanki Jerusalem nda ts'in ts'ínkjáihih ni xi kfiinkoho.

32 B'a ts'in tsjo tjíhinna nga kuichusenuu ko ts'inkj'áya ichí kutju ajinnuu. B'a katuma tsa b'a ts'in mjehe Ntíaná.

33 Ntíaná xi tsjáná kjuajyu kat'ejñajinnuu ngatento. B'a katuma.

16

B'i ts'in kikjaniñaha Pablo xuta ninku xi tjintu Romá

1 Be na nichjaá Febe. Ninku xi tjín nanki Cencrea ts'inxát'a.

² Ngat'aha Nda Ntíaná nda n'ekjóhoón xi nkú ts'ín tjihin nga n'eé ñá xi xutaha Ntíaná mahaná. Tisinkoo nga tjoohon tu mí nihí ni xi machjéhen. At'aha nkjin nkjún xuta tsasinko ko ta tsasinkona.

³ Tjoohon kjuasuniñana Priscila ko Akila, xi ta tits'inxát'aha Cristo Jesu xi nkúhu an.

⁴ Najmi incha kitsankjún tsa kuayá ngat'ana. Títsjaha máb'achjihí ngat'aha ni xi incha kits'ín. Najmi tu nku an xi b'a tíxian. B'a ta tjincha tsu ngayjee xuta ninku xi najmi ntje judio tjehen ra.

⁵ Tjoohon kjuasuniñana xuta ninku xi ma ñjakú ni'yaha Priscila ko Akila. Tjoohon kjuasuniñana Epeneto. 'Yún tjona ndo. Ajihin xuta xi tjin ante Asia, kui xi tjun kis'ejihin Cristo.

⁶ Tjoohon kjuasuniñana Maria. 'Yún tse xá xi kits'ín ajinnuu.

⁷ Tjoohon kjuasuniñana Androniko ko Junias, xi ta ntje judio tjehen ra. Ta kis'eya'yúnka nubayá jóo. Ta já postruhú jóo ko yankjún. Kui tjun kis'ejihin Cristo nga an.

⁸ Tjoohon kjuasuniñana Ampliato. 'Yún tjona ndo at'aha ta s'ejihin Nda Ntíaná.

⁹ Tjoohon kjuasuniñana Urbano, kui xi nkúhu jin ta Cristo tits'inxát'aha. Tjoohon kjuasuniñana Estakis. 'Yún tjona ndo.

¹⁰ Tjoohon kjuasuniñana Apeles, xi ja tsakúchji nga 'yún s'ejihin Cristo. Tjoohon kjuasuniñana xuta xinkjin Aristobulo.

¹¹ Tjoohon kjuasuniñana Herodion, xi ta ntje judio tjehen ra. Tjoohon kjuasuniñana xuta xinkjin Narciso, xi ta s'ejihin Nda Ntíaná.

¹² Tjohoon kjuasuniñana Trifena ko Trifosa, xi ta títs'ínxát'aha Nda Ntíaná. Tjohoon kjuasuniñana Persida, xi 'yún tjona ko xi 'yún tse xá xi kits'ín at'aha Nda Ntíaná tjenki.

¹³ Tjohoon kjuasuniñana Rufo, xi Nda Ntíaná j'ájihin, ko naaha, xi ta ko an basehe xi nkúhu tsa naana maha.

¹⁴ Tjohoon kjuasuniñana Asinkrito ko Flegonte ko Hermes ko Patrobas ko Hermas ko já nts'eé xi tjíntujíhin.

¹⁵ Tjohoon kjuasuniñana Filologo ko Julia ko Nereo ko na nichja ko Olimpas ko gayjee xutaha Ntíaná xi tjíntujíhin.

¹⁶ B'i ngján suniñohoo xinkiu. Títs'ínkjinuu kjuasuniña gayjee xuta ninku xi ts'e Cristo.

¹⁷ Jun já nts'e, tíbankinuu nga chúhūun yjonuu xi bakjanya xuta ko xi ts'ínndyjajihin xuta. Kui xi fi kontraha ni xi ja tsinchiyó. N'e t'axíhūun yjonuu xuta xu'bo.

¹⁸ At'aha xi b'a títs'ín najmi títs'ínxát'aha Nda Ntíaná Jesucristo. Ni xi tsjo níhi tíincha bangisjai. Én sin én nda nchja nga b'anachaha xuta xi najmi kjee 'yún mankjihin ni xi ts'e Ntíaná.

¹⁹ Ya tu má xi tjeén ni nga tínu'yá'ón. Kui nga tsjo mahana ngat'a ts'ajun ko mjena nga 'yún kamankjin sanuu ni xi nda ko nga kuankín t'axíhūun ni xi najmi ndoo.

²⁰ Ntíaná xi tsjáná kjuajyu, kui xi ts'ín nga n'e nganohoo ndanindoo. Kas'enuu kjuandaha Nda Ntíaná Jesucristo.

²¹ Timoteo títs'ínkjinuu kjuasuniña. Kui xi tjenkona nga tín'exát'aihi Jesucristo. Ta

títs'ínkjinuu kjuasuniña Lucio ko Jason ko Sosipater, xi ta ntje judio tjeheñ ra.

²² Ko ta an Tercio xi títs'inntá xi nkú ts'ín títsuyana Pablo, títs'inkjínuu kjuasuniña, an xi ta s'ejinna Nda Ntíaná.

²³ Gayo títs'ínkjinuu kjuasuniña. Ni'yaha tíjña. Yo má nga ma ñjakú ngayjee xuta ninku. Ko ta títs'ínkjinuu kjuasuniña Erasto, xi tjihin xá nga f'átjo toohon xuta nantjo, ko ta nda nts'eé Cuarto.

²⁴ Kjuandaha Nda Ntíaná Jesucristo kat'ejñajinnuu ngatento. B'a katuma.

B'i ts'ín kits'ínkje Pablo xujuin

²⁵ Kan'etsjoho Ntíaná. Kui xi kamaha nga ndjá ts'íínkinchánuu xi nkú ts'ín tíjña én nda tsuhu Jesucristo xi tixinya ko tób'enjímía. Tís'ejña chji nd'ai ni xi kis'ejña 'ma nkúhu nú chá ján.

²⁶ Ja tís'ejña chji ni xi nkú nga títso xujuhun já profeta ko tín'ekint'é ngayjee xuta xi tjin asuntee. B'a kitsú Ntíaná xi tíjña tók'un sín nga b'a n'e tu xi s'ejihin ra ko kuint'é'éhen ra ngayjee xuta.

²⁷ Ngat'aha Jesucristo kas'ejña chji síhin kjuachánkaha Ntia, kui xi nku tutuu ko xi nkjink'uun. B'a katuma.

Éhen Ntíaná
New Testament in Mazatec, Jalapa de Díaz
(MX:maj:Mazatec, Jalapa de Díaz)

copyright © 2013 Wycliffe Bible Translators, Inc.

Language: Mazatec, Jalapa de Díaz

Translation by: Wycliffe Bible Translators, Inc.

Mazateco, Jalapa de Díaz [maj], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, Jalapa de Díaz

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

e05183c2-7c34-5cdd-8c78-15ea51bd8cbb